

摛藻堂四庫全書薈要

集部

欽定四庫全書

倉要卷一萬四千一百六十四

集部

武夷新集卷九

宋 楊億 撰

墓誌

四首

故宋陝州芮城令清河張君墓誌銘

并序

君諱仲仁字子信其先清河人後徙建安之吳興遂為  
著姓當王氏之據有閩越也曾祖從嚴為州里豪右材  
兼文武仕至浦城制置副使工部尚書祖贊以賞延之  
典署建州長史烈考仁邈檢校左散騎常侍君即常侍

之次子也與伯氏同生居上為弟風格甚類趣向多同里巷相疑家人莫辯每異其服飾以自別焉君爰自童蒙服膺儒素韻宇冲粹智略縱橫李氏之平建安也常侍辭疾家居累徵不起君策杖行在叩闈上書朝論奇之即授太常寺奉禮郎改秘書省校書郎調補本州松溪尉江表平入朝歷衛州衛縣主簿青州千乘尉達州巴渠簿兼令尉事遷陝州芮城令以疾去官旅寓京師尋訪醫藥積日彌久美瘳愈滋肩舁而歸遂成沈痼清

漳卧病既十年而未瘳東岱歛魂俄三號而不返以咸  
平三年六月十八日卒於仁風里之私第享年六十二  
其年某月日歸葬於裏衝源順也君娶武寧章氏生子  
三人長為舟舉進士次垂象早亡次為式女一人適進  
士章單自君之被疾也為舟等夙夜扶侍躬親左右靡  
神不禱靡藥不嘗蒸蒸服勤目為至孝予從祖兵部即  
君之元舅君之先夫人實予之尊姑某之與君猶丈人  
行也平生游處顧託乘以猶新舊館過從嗟脫駿之無

益謹銘翠琰以志佳城銘曰

天之德兮世濟美仕兩朝兮宰百里政之善兮瘳何美  
禱之久兮藥勿喜返九幽兮隣萬鬼人之生兮胡至此

宋故主客員外郎直集賢院高平范公墓誌銘

并序

咸平五年二月戊寅集賢學士主客員外郎高平范公  
暴中風眩終於上都甘泉坊之私第上以賢相之後形  
於歎息戚里之懿優其贈赙兩宮遣使以赴吊四鄰聞

喪而輶眷交遊慟哭於寢門行旅咨嗟於間巷非椒蘭  
之德服媚於人梁棟之材中道而夭者疇能痛惜如是  
哉公諱貽孫字餘慶濟南歷城人其先歷虞夏商周實  
享世祿春秋戰國繼出名卿或以博士顯東京或以詞  
人稱南國或以文雄史策或以信著友朋蕃衍流光非  
可殫舉及公之大父守愚占數京輔隨牒方州為鄭州  
防禦判官命屈當時慶鍾後嗣累贈太子太師王父故  
魯國公諱質以伊管事業輔翊三朝以燕許手筆稱量

天下由司徒侍中罷為太子太傅魯國公而問望益大  
恩禮彌渥將為蒼生而再起遽歎哲人之云亡然自五  
代以來百年之內號良弼者不聞他人累贈至尚書令  
烈考諱旻以公卿子著籍甚之稱在貴遊間有台輔之  
望文章組繡於鞶帨心計剖析於毫釐任給事中三司  
副使公累謫宦事備國書由公上言追復官爵累贈至  
工部尚書公以岐嶷之姿荷清白之訓思以學優入仕  
恥由父任為郎不雜塵遊專精墳史果以鄉里之荐亟

預賢能之書天子臨軒擢居乙等同年生率次補州郡從事掾屬丞尉天子以公奕世載德肯構象賢欲其起家不循常調解褐授大理評事雍熙中林胡犯邊王師致討飛輓之役公實董之祇畏簡書大足兵食凱旋遷光祿寺丞數月改秘書省著作佐郎面賜五品服公以羣玉上帝之冊府蓬萊道家之藏室賢俊咸集喜田蘇之與遊圖史實繁多黃香之未見於是削章退食獻賦離宮即日命公待制文館數月以本官直集賢院自是

紬書石室侍宴瑤池歌黃鸝於建章必陪賡載泛樓船  
於汾水即奉豫遊以冠玉之英標屢聞題柱以燃真之  
敏思幾至奪袍其風度閑詳才調清婉士流推慕時論  
歸之登朝為殿中丞遷太常博士上即位入省為外郎  
皆領書殿之職公克纂緒業祇荷門閥寢丘遺產非有  
膏腴晏子舊居未更爽塏而能孝以睦族儉以飾躬即  
安先人之廬不違王父之命雅好禮法尤重名節奉蒸  
嘗之祀馨德達於神明事期功之親歡心洽於宗黨性

嗜羣籍家藏萬卷或手自繕寫或親加校讎絅素畢陳  
敵秘書之副本籤題具列同吳氏之西齋好事之名流  
布京轂每風庭月榭蕭辰蘭夕必命儔嘯倡銜杯漱醪  
凡備三益之友莫匪一時之雋漢庭太史或奏於聚星  
齊國客卿無嫌於卜夜此亦沖襟高韻夐越常倫尚德  
好賢有足多者嗚呼不幸今也其亡享年四十三斯夭  
也已矣夫人高邑縣君李氏實淮陽丞相之妹洪惟伯  
姊母儀萬邦作合先朝居尊長樂而夫人處貴思降在

富能貧周旋禮經輔佐君子得中饋之道彰內助之賢  
舉按齊眉方期於偕老惟堂畫哭遽痛於未亡一子克  
勤年十一歲天子憫之特授太常寺奉禮郎月給俸緡  
俾終服紀固有奇骨荷茲高門雖在童蒙已知孺慕有  
後之慶斯言不誣一女尚幼夫人以喪無慮居禮當即  
遠毀家襄事竭力送終伊洛之間松櫓斯在日月其吉  
龜筮無違即以其年十一月戊申扶護歸葬於河南府  
洛陽縣某鄉某里祔於先塋之側嗚呼劫燼灰飛沉碑

谷變非刻金石曷志桑田以某投分平託之銘篆巨  
源尚在庶嵇紹之不孤伯喈有言述太丘而無媿銘曰  
范氏之先出於陶唐積德儲祉奕葉流光赫赫魯公蟬  
綆貂璫陰德有後乃生夕郎於惟集仙肯構肯堂穆然  
容輝煥乎文章行歸於周動罔不臧嗚呼難忱令也即  
亡洛水濱兮邙山址波東傾兮樹西靡從先公兮夜臺  
啓新阡兮萬里傳三世兮一身閟九泉兮萬祀琢貞石  
兮志佳城人之生兮胡至此

宋故推誠保德翊戴功臣鄧州管內觀察使金  
紫光祿大夫檢校司空兼御史大夫上柱國  
長城郡開國公食邑二千四百戶食實封四  
百戶贈戶部尚書錢公墓志銘并序

咸平六年秋七月詔鄧州觀察使并代等州經略使長  
城公歸京師疾故也上開宣室御武帳延登前席勞問  
數四以公美疹初復未任朝謁賜告就第俾之頤養迄  
九月勿藥有喜入謁未央宮自是五鼓登車晨趨無廢

三杯退食常膳載加朝野之人室家相慶喜良臣之獲  
祐而斯文之未喪也十月戊寅宿戒知友會竺乾之宇  
為桑門之饌與開士輩談苦空讚真諦俄起更衣偃然  
就枕若假寐焉少頃視之乃風眩暴作如大醉狀肩舁  
歸第是夕以不起聞享年四十有四上臨軒震悼遣使  
吊問法賄之數有加常等窀穸之事悉從官給翼日詔  
贈戶部尚書天子以公母夫人在喜懼之年有羸老之  
疾不克終堂之養實深擠壑之痛特命中貴人面賜白

金三十斤禮極哀榮恩霑存歿君臣之際斯為至矣公  
諱若水字淡成河南新安人蓋凌烟功臣巢國公九隴  
之後世胄閥閱譜牒存焉贈太子太保萼追封琅邪郡  
太夫人王氏曾祖妣也贈太子太傅柔追封清河郡太  
夫人丁氏祖妣也尚書司門員外郎贈太子太師文敏  
烈考也往者公叅掌萬機追榮三代始贈孤卿再躋極  
品至於延鄉之命乃慰令伯之心蓋由夫錫羨貽謀重  
世始大臧孫於焉有後太丘以之無慙者也公始在孩

稚穎悟不羣爰自青衿即齒鄉校開卷成誦發言有章  
纔十歲能屬文逮志學之年已博涉六藝方領矩步比  
肩諸生而符采超邁襟懷散朗山庭月角蓋有公侯之  
相瓊樹瑤林自是風塵外物華山陳搏一見公以為有  
仙風道骨名在丹臺紫府中柏閣僧宗裏者有人倫之  
鑒獨識公於儕輩且云斯人者異日登金門上玉堂升  
赤霄捧白日矣太平興國七年詔郡國貢士河南太守  
以公首荐於賢能之書時纔弱冠會有期功之喪不克

隨計再上登甲科解褐同州觀察推官專以經術緣飾  
吏事至有鄰郡之民滯訟未決不遠千里來求片言時  
先太師掌內帑於西都倉卒捐館公見星而往指景悼  
生泣血倚廬柴毀骨立左馮之人相與列狀太守且云  
失賢從事民將疇依升聞於天特俾權奪公墨縗而贊  
幕畫心喪以畢禮經郡政倚成毗頌尤塞令三司使夏  
官侍郎上谷公時任樞密學士領選部方與天子論思  
帷幄之中進退天下之士而品藻人物講求茂異致致

慰荐惟恐不及當是時公及太原王扶潁川陳充同郡  
錢熙皆為外諸侯賓屬即抗章以聞咸傳召歸闕天子  
命丞相府召試以公文最高超拜秘書丞直史館中謝  
日面賜紺衣銀魚自扶而下只除殿中丞不得與公比  
明年拜右正言知制誥與令給事中柴公成務呂公祐  
之諫議馮公起叅知政事王公旦同制並命焉淳化三  
年郡國貢士凡二萬人貢舉已來莫斯為盛天子詔公  
同掌文柄數月又命案行平涼五原等郡公乘驛至塞

下盡得其利病歸奏於青規中畫地聚米如指諸掌天子嘉歎且諭以登上之意公辭以身被逢掖業在黃卷得司誥命為詞臣足矣天子乃召公入翰林為學士自屯田員外郎遷職方仍賜三品服審官辨論人材周太宰之任銀臺出納王命漢尚書之職又詔公兼總二司焉至道元年春正月命公為右諫議大夫同知樞密院事進階朝散賜勲柱國樞衡之任機務在焉自唐朝已來皆二廣兼領逮朱梁之後與三事抗衡至若赤白之

囊曉傳邊奏輶軒之使夕發兵符承密旨於禁中授成  
筭於闇外丞相有所不聞也天子以公忠肅明允溫恭  
篤慎付以是任一二咨之未幾太宗上仙聖皇紹統擢  
拜金紫光祿大夫尚書工部侍郎進封長城郡侯策勲  
上柱國餘如故上以公顧命大臣股肱良弼虛懷延納  
垂拱仰成公亦夙夜在公憔悴事國小大之務思竭其  
力而致其身謨猷之言必沃乎心而逆乎耳穆清體貌  
曾靡違顏私庭休沐不遑調膳一日乘清閒之宴面陳

至誠直以聖朝之日長高堂之齒暮願得綠衣膝下以奉其歡心上敦諭再三不俞其請公兩奉奏牘確乎不拔上將欲崇進其秩公頓首固辭即以本官罷機務充集賢院學士判院事俄受詔修永熙國書公即引給事中柴公成務侍御史南陽宗度秘閣校理濮陽吳淑及億亦在選中曾未期年書成奏御既終乙夜之覽爰備名山之藏上又以太祖皇帝十七年中經營四方削平海內規模宏遠功德茂盛當時史臣殊為簡略又命公

舉爾所知再加論次公辭不獲免乃奏故刑部郎中知  
制誥王公禹偁今翰林學士梁公顥知制誥李公宗諤  
趙公安仁纔及周星俄已絕筆彌縫闕漏號為詳備兩  
朝大典出於公手百代而下垂為信書俄掌吏部三銓  
兼秋曹案讞會鳴鑄入寇大輶親征公扈從鈞陳駐蹕  
全魏或燿火傳警羽檄交馳天驕舉南牧之師雲臺有  
未決之議上必遣親近咨其計策給以筆札受其條對  
六羸宵遯萬乘天旋命公權開封府事鄴都缺帥北顧

是憂命公知天雄軍府兼兵馬部署言事者以上郡之地控扼黨項宜修復城隍大聚兵穀朝廷惑之發卒萬人羸糧深入因舉夫版築之役而謀夫盈庭利害蜂蜂上未能決適公自魏乘驛會師於離石以幄幕九張兵車百乘意決野宿凡五日造廢壘焉公據鞍少選當機立斷輒罷其役飛章以聞宸襟洞開疑謀冰釋因詣闕而白其狀上嘉納慰勞適屬親試貢士命近臣考甲乙科第俾公預焉東堂校文時推精識西清賜對帝善其言

數日又命公撫巡陝西緣邊諸郡且以便宜從事凡七  
旬復命上謂公曰天官書上將次將位在文昌宮漢宣  
亦云邊境有事左右之臣皆將帥也文武是憲內外迭  
處亦何常之有公不能諭上旨翼日有獲下之拜上以  
太原西北勁兵處控帶雁門雲中匈奴之所走集思得  
賢帥付以師律即命公兼并代等州經略等使判并州  
事盡護諸將倚為長城又下詔案行邊塞周視亭障并  
土嚴凝窮冬尤劇擐甲胄者或至墮指襲狐貉者僅如

懷冰公夙駕載馳蒙犯霜霰且多飲醇酒以禦寒氣因傷肺得疾頗施鍼砭忽瘍潰於脰流血石餘四體蕭然僅存微喘上遣中使太醫冠蓋相望又別賜手札丁寧欵密初蒙藥石之効未任軍旅之事適會府州有所經度公將力疾而往上亟令止之雖漳濱有瘳而衛幕多故伐謀制勝固可以坐籌破虜虜兵亦難於卧獲乃降優詔俾之來朝方將驗上池之十全延明庭之三接出驅六纛授鉞鉞以專征入序九功登巖廊而論道為國

方召播美於聲詩致君堯舜躋俗於仁壽如何奄忽乃至云亡里巷輶春搢紳揮涕管公明不及嫁娶遺恨終天張元伯頓隔死生緒言在耳嗚呼即以其年十二月壬申歸葬於河南府新安縣暖泉鄉祔於先塋禮也公歷階至金紫策勲上柱國視秩水土兼職風憲三進爵為郡公真食至四百戶功臣之號凡三加焉祿位官封亦云盛矣一子延年秘書省正字始七歲雖在稚齒了無童心僻踊哀摧啜泣孺慕出於天性殆過成人貌是

遺孤庶乎有後公母范陽盧氏累封濮陽郡太夫人夫人  
人榮陽鄭氏故殿中丞處升之女封北海郡夫人皆以  
公貴也兄若訥若虛早亡若愚令任大理評事通判台  
州公於昆弟中為最幼貌缺略薄若冲從父弟也大

理評事維周前河南永安簿智周兄之子也皆由公而  
成立焉公眉宇秀拔道籙標映體二鄰幾識探繫象下  
學上達文成雅誥克已恕物殆過放麑之仁虛受兼容  
乃有涵牛之量善談名理聽之者更僕忘疲多識典故

扣之者撞鍾輒應品題人物汝南之子將坐鎮雅俗東  
晉之安石挹其儀表者若披雲霧與之游從者如薰椒  
蘭蓋所謂鑽之彌堅仰之彌高澄之不清撓之不濁者  
也公在先朝時為北門學士與故刑部侍郎張公洎同  
日覲上天子喜金鼈之得賢詠嘉魚而申美特詔宣導  
國樂魚龍雜戲近臣咸預式宴盡歡時方隅未寧邊候  
屢警在於內署實司密命每天子臨便坐決策奏軍書  
手詔急於星火斧扆之側授簡立成曲盡事機不加點

竄秉筆者推之掌審官之柄也如良工度材輪轉咸適其用雖小人懷土胡越不違其情罷黜蒙於安全淑慝以之區別居中樞之地也罄竭謨猷參決機會守正持重曾不將迎憂邊思職屢蒙嘉獎屬輿起益郡盜據坤維綏湯網者居多皆呂刑之不宥賴公全活寶繁有徒且以慎密自持彌綸無迹詭詞而出雖溫樹以不言陰德豈誣在里門而終大嘗以為百年之計莫如樹人三代之昌皆由得士姑務引翼以答恩遇祁司馬之舉善

外不避讎鄭當時之薦賢言之有味又以難進易退儒者之行既得患失鄙夫所為乃辭祿樞府退就書殿士林歌頌堆案盈几馳競頓息風俗歸厚既而述唐虞之二典極班馬之三長西狩終篇南箕起謗或以不署宰衡是為專美或以倒置昭穆於焉瀆宗公討尋故實援引詔令廷諍數四策書乃定羣邪側目正人增氣領選部也山公啓事多所薦陳掌秋曹也不疑平反號為寃大權蒞京轂也獄囚數百一旦決之桴鼓稀鳴鈎距靡

設雖曰浩穰殆臻清淨出撫魏郡其政亦同乃有元戎  
貴侯高牙大旆提七校之師中人內侍銀璫左貂從九  
天而降公卮酒大載率以交驩郊勞飲餞曾無違禮俸  
緡靡給私帑屢空坦然放懷不以屑慮及罷上郡之役  
而晉民息肩握大鹵之兵而胡騶屏跡乃至易簣而沒  
家無餘財行路之間人皆流涕非誠信素著譬李廣之  
不言仁惠見思同子產之遺愛者安能及是哉公有德  
有言多材多藝精數術善評書畫雅好班固漢書常

日讀一卷周急好施勞謙善下多所折券未嘗治產收  
養孤幼侔邱成分宅之仁協比親戚掩游吉亢宗之說  
勤接士類皆虛往而實歸善與人交必相先而莫逆薦  
引後進有知人之明購求墮簡侔秘書之副每燕居私  
第角巾東道叩虛課寂味茲玄闕近年深信佛乘雅習  
禪觀隱几終日陶然自得歸全之明日上遣近侍求兩  
朝策書遺草若冲等搜於巾箱盡以進御且述素志願  
得薄葬免於勞民上亦允其請茂陵遺札幸天子之見

求京兆新阡固鄉人之不犯族子光祿寺丞易卓犖稽  
古時之間人集公生平文章為二十卷某辱公之顧為  
日斯久道同氣合心照神交親奉齋終幸無怛化知音  
逝矣空絕伯牙之絃冢樹蒼然誰表延陵之墓含酸隕  
涕且為之銘銘曰

明堂肇基衆材具施如何棟梁中道而隳元首睠懷同  
體是宜吁嗟股肱一旦而虧腹背何益鏗茲六翮礮砆  
奚為喪我垂棘人失司南國亡遺直空餘語言布在方

策嗟太山兮其頽悲玉樹兮將埋悵浮生兮朝露閟英  
魂兮夜臺伊南州之高士兮徒漬酒以申哀背鮮原兮  
臨紫陌啓新阡兮從舊域嚴封樹兮禁樵蘇志泉扃兮  
刻金石諒西土之耆老兮盍樹碑以表德

宋故翰林侍讀學士朝奉大夫右諫議大夫騎

都尉賜紫金魚袋榮陽潘公墓誌銘

并序

咸平初天子端委穆清順考古道思近耆德樂聞語言  
於是徵漢代金華之舊聞考唐室翰林之故事特置侍

講學士之職時予從祖七兵尚書故戶部夏侯貳卿令侍郎河間邢公中丞呂公竝預選茲後三歲令丞相畢公自上黨驛召既至即以命之又再歲自郎署擢河南潘公為諫議大夫授以茲任八年之間六人而已公亦既拜命人無間言時屬天驕犯邊軍烽日警天子將躬秉武節展義兩河而公以肅父之姿處切近之地時朝備問言多沃心中涓諭旨退必削橐及輿駕薄伐勤勞扈從晝驂乘於襄野夕宿衛於鈞陳從羽獵於儲胥陪

王食於雲幄蒙犯霜霰因而遘疾猶親奉宸旨致祭洪  
河沈璧浮牲精意懇倒及復命行在移幸澶淵晨趨幕  
召夙夜匪懈中乾愈甚束帶不任王人國醫存省相繼  
嘉言密奏啓沃未忘美疹漸滋皇慈彌渥特奉明詔先  
還上都肩舁啓行郵亭先置星言夙駕有加無瘳及旅  
凱班旋膏肓沈痼精爽將竭方寸不亂月正元日殆於  
彌留猶召故人執手為別且占遺奏不令託孤歎逝者  
之如斯痛主恩之未報言訖瞑目至夕奄然皇上軫悼

良臣賈遂加等以其子太廟齋郎汝士為大理評事正  
字汝礪為太常奉禮咸賦以祿俾之終喪又詔有司給  
方舟載其柩歸葬豫章從遺志也恩禮之厚無以為比  
公諱慎修字成德其先滎陽中年人唐末避亂遷於閩  
粵治產作業遂為著姓當王氏之偏霸也曾祖武源以  
丘園之秀預弓旌之招受署福州古田令祖崇襄種德  
務滋懷才不試世難方棘肥遯終身烈考承祐屬雲雷  
之遘屯負公台之偉量嘗事吳為蘄州法曹掾郡守以

非法致死罪抗議不奪投手版而歸王延政據建安且  
欲倚以為相時閂牆結釁尋戈繼日引經義而廷諍因  
禁錮而家居江南平建州若得劇孟之一敵國也累服  
大僚專掌劇務辭禁致政得刑部尚書歸隱洪州之西  
山優游沒齒妣清河張氏以從夫之貴封本郡君而公  
之顯祖贈太常少卿祖妣河間邢氏封本縣太君皆由  
尚書之故也公少負俊才習聞義訓觀書學劍包文武  
以兼資點漆凝脂越風塵而特秀纔十餘歲隨先尚書

歸金陵得秘書省正字歲滿遷校書郎未幾入省為水部員外郎賜五品服纔冠歲矣俄遷膳部先府君懸車告老公求便官就養得知洪州豐城縣歲餘以憂解職卒哭起復舊官改上元令以刑部員外郎知雜賜服金紫執法甚平持憲尤肅江右耆舊至今稱之除水部郎中兼起居舍人判待制誥領郡國之上書評諸曹之奏議益一時之劇任也關末蚩尤之旗亘天龍驤之師渡水公將危邦之地以市宴為名使交兵之間履不測

之險既陳土貢於牢旅且留別館於都亭時後主先命  
同氣之親來謝不朝之罪羈縻未遣休戚攸同王師所  
加捷音繼至金湯失守顧宗國之將亡玉帛旅庭齒外  
臣而致賀邸吏懼其後至所司督其不供公介然抗議  
以為不可每內朝稱慶但拜章待罪太祖重其知禮嘉  
其有辭特遣貴臣親諭上旨改命供帳增給餼牽及青  
蓋來朝朱扉賜第太祖以公質性忠厚特授太子右贊  
善大夫俾事故君是為上介思喬木於故國尚見世臣

曳長裾於王門兼掌記室太宗嗣位以恩例累進階勲  
後主考終由府罷復預朝請歷太常博士虞部倉部考  
功三員外郎郎中出通判壽州知湖州梓州凡十年在  
外故鄧帥太傅李公典領中秘書方求碩儒以充近署  
遂引公入直秘閣出入交戟偃息周廬刊正遺編蓋手  
不釋卷祇膺清問必膝之前席善談名理言為陽秋勤  
接士類心無城府江東人物率執贊而宗予漢庭公卿  
多致恭而尚齒允所謂南州之高士儒林之丈人也然

自博極羣書優游一紀素髮垂領僅類郎潛凝塵滿席  
不嬰世務婚嫁未畢屢求典於方州年德俱高果入參  
於近侍將記言於惇史遽歸全於厚夜嗚呼享年六十九  
公前娶汝南周氏今夫人東海徐氏封本縣君即故  
中書侍郎上饒郡公景遜之女也建康大姓連姻戚里  
柔儀惠問宜家睦族俄遘未亡之戚實深偕老之痛率  
其二子奉公之喪歸於洪州祔先尚書之塋從治命也  
公四子長玄亮端拱中舉進士補大名朝城尉次玄成

皆早亡五女長適福州寧德令邵良弼次適蘇州常熟  
令岑頓先公而逝次適興元府觀察推官龔紀次適大  
理寺丞張安期故叅政刑部侍郎洎之子也一尚幼而  
許嫁待年而未行公風度詳閑襟懷夷曠旁通多可虛  
受兼容雅善棋奕技臻絕品先皇帝萬機之暇常以方  
罈自娛公屢蒙三接之召親奉一枰之戲退而作棋說  
以獻天子異之蓋多藝多材姪公自許執御執射仲尼  
之言雖餘力之使然亦天機之獨妙叅掌記注猶及金

匱之闕文屢奉宴遊嘗續柏梁之高韻生平著撰壹委  
筐箱諸郎等方在哀迷未遑論次長卿遺札冀武皇之  
見求叔夜孤兒幸山公之尚在永懷舊德髮鬚緒言揮  
涕濡毫以志陵谷銘曰

全吳之地纘唐之祀公臣舊邦罔有貳事開寶之季王  
師摩壘公使交兵茲亦盡瘁一心事君典訓攸聞公之  
奉上茂貞純兮十年不調先民是悼公之為郎殆華皓  
兮西清北門宴見諮詢簪筆持橐奉至尊兮靈旗大輶

徂征赫怒巾車脂轄陪天步兮公已白首始邁元后富  
貴之來逼蒲柳兮公踐玉堂入侍聖皇寒暑之疹在膏  
肓兮時不與兮道攸遠志將亨兮命彌蹇旅艤歸兮春  
草長銘旌飄兮白日晚瞻冢樹兮成行悲逝川兮不返  
永齋志兮首丘長垂名兮汗簡

武夷新集卷九

謹案卷八第十四頁後四行於是募鄉民之拳勇  
者數百人原本募訛募今改

第二十一頁後五行雅有婦德原本雅訛惟據別  
本改

第二十四頁後二行即以其年丁丑歸葬于潭州  
長沙縣長沙鄉原本丁丑訛丁日據別本改

卷九第十一頁後三行利害蜂蜂按蜂蜂二字疑

訛

第十一頁後六行輒罷其役原本役訛後據宋史  
改

第十七頁後八行陪玉食于雲幄原本陪訛倍今  
改

總校官庶吉士臣張能照

校對官編修臣閔博大

謄錄監生臣吳魯田

欽定四庫全書叢要

集部

武夷新集卷十一

臣王杰詳校  
詳校官助教臣常循



欽定四庫全書

會要卷一萬四千一百六十五

集部

武夷新集卷十

宋 楊億 撰

墓誌二

三首



宋故推忠協謀佐理功臣光祿大夫尚書右僕  
射兼門下侍郎同中書門下平章事監修國  
史上柱國隴西郡開國公食邑三千八百戶  
食實封一千二百戶贈太尉中書令謚曰文

靖李公墓誌銘

并序

景德元年秋七月乙酉大丞相僕射隴西公早朝至待漏舍不俟鑰出而歸疾故也輿翼日車駕幸其第親至卧内存撫甚厚賜白金三百斤既還宮以不起聞上又臨哭出涕初公之疾也中人太醫絡繹旁午於道逮公之薨也千乘萬騎一日再幸其居國隕宗臣帝失元輔都城為之罷市功女以之寢機同體既虧實太上之深戚斯文將喪顧天下而誰宗嗚呼哀哉真古之遺愛也公諱沆字太初其先趙郡人廣武君之後也策書所載

世德茂焉泰陵令累贈侍中豐追封號國太夫人滕氏  
曾祖父母也洺州團練判官累贈中書令滔追封魯國  
太夫人苗氏王父母也侍御史累贈尚書令炳追封陳  
國太夫人周氏考妣也公韻字宏廓襟懷沖粹特資異  
稟卓然不羣甫及成童性靡好弄逮於就傳言必有章  
七歲能屬文十歲通五經大義服膺素業既冠而大成  
比肩諸生命鄉而高薦時春官氏方虛甲科以待屬丁  
先府君之憂自大梁而抵羣舒幾二千里見星泣血哀

感道塗食鬻倚廬毀深欒棘先府君歷佐使府及剖郡  
符徇公減私輕財好施以經遺子市義於人暨啓手之  
辰無兼金之蓄公承清白之訓持窘絕之家有原憲貧  
病之憂茂張仲孝友之德太平興國五年舉進士得高  
第解褐將作監丞通判潭州郊祀遷太子右贊善大夫  
八年歸朝為著作郎當是時也天子方端委穆清詳求  
茂異崇建冊府養育人材公之益長沙也椒蘭之德在  
人金玉之音盈耳輶軒密啓外臺陟狀稔熟於上聽喧

塞於公議中謝日太宗命中貴人送丞相府試文一通  
以本官直史館賜五品服雍熙中今工部尚書王公化  
基任左拾遺上封公車大言自薦太宗謂執政曰李沆  
宋湜皆佳士也可并試之明日並命為右補闕知制誥  
公之位在二公之次上特令公首冠焉又賜錢百萬天  
子知公貧多權錢富家出倍稱之息又別賜三十萬俾  
償之端拱初遷職方員外郎掌誥如故來年受詔與今  
學士承旨禮部尚書宋公白同知貢舉是時天子始命

復舊制委有司貢部翕然有得人之譽未幾召入翰林充學士賜金紫又奉詔與今丞相上谷公同掌選部澄汰流品旌別淑慝清通簡要時譽歸之公之在內署也或乙夜觀書之餘備前席受釐之間風規醞藉占對嫋雅弼違獻可上多沃心稱善舉能言皆有味天子知其才可以緝熙帝載察其德可以鎮厚風俗乃有意於大用也淳化二年拜給事中叅知政事是時天子方循名實以考百揆謹吏事而責三公公勵翼一心將明庶政

水潦僅止閭閻息愁歎之聲名器有倫搢紳絕僥倖之  
路彌縫闕職迄至小康俄罷政事以本官奉朝請雖坐  
策免時望彌重未幾丁太夫人憂柴毀過禮先是公疏  
戚同居功總百口冒比弟致美家人忘貧賦祿雖優量入  
都盡及罪樞務復罹哀疚居喪盡禮送終竭力殆於食  
貧曾不屑慮優詔起復辭不得請俄以本官知昇州因  
奉璽書請對便坐天子留而不遣改命知河南府兼留  
守司事二周變風期月報政纔及滿歲召歸闕庭屬光

啓承華克固邦本疇咨羽翼輔道子元良即以公為禮部侍郎兼太子賓客特詔賓護之職一用師傅之禮仍屈儲君之重先施下拜之儀公請見頓首辭不獲免皇上踐極拜戶部侍郎參知政事未幾以本官平章事監修國史進位中書侍郎屬鳴鎬犯邊翠華薄伐居守之任根本斯繫關中圖籍委鄰侯以無疑東郊保釐非畢公之為比上親握武節躬御六師北涉大河駐蹕全魏勞軍而連營賈勇展義而編毗案堵胡馬引去邊塵載清

無有南顧之憂克定一戎之業者繄公之力也公亦坐  
鎮京邑兼容獄市令行禁止不戮一人千門萬戶曾無  
吠犬及鑾輶凱旋謁見行在置酒幄殿奉觴上壽勞問  
優縟體貌尤異清中除道奉迎至尊同德一心光輔大  
政來年進位門下侍郎屬有事南郊加尚書右僕射餘  
如故公踐師長之秩處承弼之地屬西北二鄙金革未  
息伐謀制勝實賴前籌調發均輸曾不暇給當寧靡寧  
於旰食宰府專責於憂邊公夙夜自公憔悴事國任重

責大智困神疲休澣在辰稀得出沐腠理徵瘳不敢寧  
居筋力前衰精爽坐竭岑江陵之盡瘁天子先憂張司  
空之云亡星文告變嗚呼享年五十有八詔輶視朝五  
日贈太尉中書令上又別次發哀羣臣奉慰追錄嗣子  
逮於周親乃至外姻諸甥常從給使咸被延賞之澤悉  
膺非次之命又特命昭宣使恩州團練使李公神福監  
視葬事太常考行謚曰文靖發引之日有司具鹵簿大  
鴻臚持節護喪即以今年五月庚申歸葬于河南府洛

陽縣賢相鄉積潤里從尚書令府君之塋禮也公積階至光祿大夫策勲上柱國三進爵為公真食至千二百戶功臣之號凡再加焉祿位寵名皆人臣之極也前娶清河張氏永興軍司馬忠輔之女生一子曰翁朝三女長適右諫議大夫薛映次適奉禮向傳正相國河內公之子也次數歲而夭及公之薨張夫人之所生無復存者今夫人沛國朱氏累封越國夫人故太常少卿致仕累贈工部侍郎洞之女婿于台宰宜其室家作範中閨

啓封大國齊眉舉案禮極如賓晝哭帷堂痛深偕老生  
四子三皆早夭幼曰宗簡大理評事五女長適著作郎  
直史館王曾執喪過哀遇疾而逝次皆幼公三弟曰贊  
虞部員外郎知洛陽縣陳力就列員適時之才曰源太  
子中舍裕盡亢宗真保家之主曰維戶部員外郎直集  
賢院文行第一見推朝倫克荷世家允為國器公風鑒  
融朗天性謹厚自結髮為學靡雜塵游雖燕居慎獨如  
臨賓祭視童無誑處闇罔欺韋編屢絕不閱非聖之典

東帶未既不答嚴君之召先府君常語人曰此兒異日必至公輔知子之明蓋無媿矣及計偕續食發策決科引籍周行通直延閣水懷珠而川媚林養棟以材成絲是升右掖以司言入內廷而待詔五代已來文體一變至於雅誥殊未復古公之書命也啓迪前訓潤色鴻業善為辭令長於除書考三代之質文取兩漢之標格使國朝謨訓與元和長慶同風者繄公之故也及參貳政柄彌綸事典守正持重不務將迎出莅瑣闈恪居官次

靖恭夙夜曾無澄撓尹正西洛茂宣愷悌之風調護東朝助成明良之德暨再掌鈞軸正位巖廊斟酌治體辯論官材人斯具瞻帝用親倚謀事補闕夜思晝行納誨盡規有犯無隱深識大體務行故事終年公府未嘗案吏退食私第靡有謝賓加以慎默寡言質直無矯百職延見多虛往而實歸兩府論議必守經而據古將順歸美而不喜詭隨夕惕補過而深懲滿假茲所謂皇家之柱石神化之丹青也至如喜怒不形進退可度陟降盡

室尺寸靡差吐嘔車茵醉飽必怒賦祿雖厚奉身甚薄  
萬錢之入周急屢空數畝之居偏下已甚不問家事不  
恤人言疇昔交游淡水之情無改平生恩德一飯之報  
不忘性絕玩好專聚圖籍孜孜繕寫躬自讎對崇奉內  
典洞曉真諦每宴居靜慮深念無生旁行四句堆案盈  
几雅善筆札特臻其妙嘗所著述遺藁頗多季弟維論  
次編聯成二十卷立言不朽其在茲乎諸弟等以某為  
相府舍人多歷年所欽奉全德飽聞緒言見徵銘篆之

詞以防陵谷之變某早在薦紳之末特蒙國士之知雖年輩相遼位貌非等更僕之論固嘗莫逆於心沈石之文庶幾傳信乎後是為實錄諒無媿焉銘曰

聖作物覩帝賚元輔如鼎三足猶天八柱翊宣大猷康濟庶務袞職有闢仲山是補顯允相國光弼大君謨明亮采師古經文道類矢直政無絲棼百工時入九流洞分公德如風孰不靈靡公言如蘭人斯服媚大成典謨學探象繫鳴呼彼蒼胡不憇遺公心如秤重輕誠懸公

道猶龍鑽仰彌堅功熙帝載識化窮源哀哉哲人胡不  
永年它人蹄涔可以揭厲公陂萬頃涵泳無際它人塊  
垣殆見室家公牆數仞德音孔遐公掌大鈞平章百揆  
思職憂邊匪躬盡瘁哲人其萎二豎生沴桃蕕臨喪禮  
優賜襚公輔大政高朗令終易名贈秩褒德顯庸十世  
猶宥九原啓封鹵簿賜葬都城輶春馬悲鳴兮車結轍  
弩矢驅兮班劍列靈輶駕兮祖奠徹銘旌飄兮楚挽咽  
伊人生之共盡兮唯大名兮不滅邙之蘆兮洛之涯泉

臺閒兮隴樹微宿草短兮朝露晞蒼烟暝兮夕鳥飛苟逝者之可作兮非我公兮曷歸

宋故太中大夫行給事中上柱國臨汾郡開國

侯食邑一千二百戶賜紫金魚袋平陽縣公

墓誌銘

并序

公諱成務字實臣其先平陽人漢棘蒲侯之後也世亂流寓不常厥居公之遠祖占籍河朔積德有後宗派盛焉五代祖賡因官曹南遂家於濟陰郡大王父綱廬州

別駕王父肖隱居求志藏器不耀累贈太子右贊善大  
夫祖妣劉氏追封彭城縣太君烈考自牧舉進士乙科  
應聘戎間晉末之亂奉武行德於河橋蹈危機畫奇策  
尊立漢室底定中原天步既清賞典不及逮周邦之啓  
始通閨籍踐歷臺省淹徊郎署終兵部員外郎而王父  
祖妣追榮錫命皆由兵部之故也自公之貴兵部累贈  
禮部侍郎妣丁氏追封譙縣太君錫羨流光斯不誣矣  
公風度夷雅襟靈沖粹始在孩稚迥如老成靡事塵游

不雜兒戲橫經就學昂昂有千里之姿從賦千名籍籍致同人之譽每投誠執贊前達為之致恭秉筆屬文傾都以之傳寫春官宗伯常虛甲科以待之而公思值名公伸於知已乾德中禮部員外郎知制誥王公祐適典貢部公始就鄉舉即以公冠於諸生當時朝野聳得賢之議解褐宿州軍事推官秩滿為曹單觀察從事被所知之舉遷大理寺丞監潭州茶場筦榷之利實佐於用度羨餘之績具載於簡書疇其幹蠱之才委以外計之

任改太常丞峽路轉運副使賜五品服拜監察御史知  
果州轉殿中知蘓州滿歲移充兩浙轉運使改戶部員  
外郎直史館賜服金紫除本曹郎中充三司戶部判官  
選為光祿少卿未幾充高麗國信使復命領京東轉運  
入為司封郎中知制誥遷左諫議大夫知河中府今上  
踐祚拜給事中知梓州歸朝受詔同修永熙實錄俄知  
揚州入判尚書刑部小吏犯法怒而笞之點脊無賴伏  
闕自訴適有中旨薄責其狀公以為天子從官領秋曹

六卿之任扶吏被勅禁止朝謁亦何面目復據堂決事  
耶即上言解職以本官奉朝請未幾腠理生疾勿藥靡  
徵哲人其萎頽山輿歎嗚呼公以景德元年六月某日  
考終於正寢享年七十有一公寢疾彌留方寸不亂口  
占遺奏以六歲孤兒為言上憫之特授太常寺奉禮郎  
賦以廩祿俾終喪紀即以某年某月某日奉公之靈柩  
歸葬於開封縣新里鄉汴南里小邊村汴南原舉前二  
夫人祔焉禮也公始娶趙氏故宗正少卿齊之女後娶

張氏今夫人李氏封贊皇縣君故水部員外郎峩之女  
也宜家之美內助居多德茂允宗義敦偕老三娶令族  
晚有兒息年六十有六始得今奉禮焉二女長許適太  
常寺太祝張太初今戶部侍郎雍之愛子也次尚幼二  
弟曰成象舉進士終秘書省著作佐郎曰成文任三班  
奉職實公之保任也弟之子曰貞範將作監丞曰貞簡  
秘書省校書郎皆自公而成立焉公文行首出時名籍  
甚自濯纓筮仕東帶登朝佐幕從軍頗聞婉婉之畫輶

煩治劇蓋有飄飄之刃先朝以卿士惟月時惟古官位  
實象河行有鳴玉典掌尤重表著並崇自唐已來自目為  
散地思矯前失以振舊規乃選諸曹正郎有才望者十  
人並補少列而公首膺茲任羣議允歸至若辰韓之區  
是為君子之國世修職貢乃心本朝而尺詔頒恩輶軒  
遣使撫柔殊俗震疊皇靈自非專對之才或致君命之  
辱而公奉辭于役裔壤咸懷矧內史西臺專掌訓誥代  
言之選居第一流而公允是僉諧潤色鴻業前朝國書

藏在冊府論次大典厥惟難才而公肅奉擬倫裁成信  
史建於出典劇郡必樹於風聲入奉內朝式瞻於儀表  
經笥學海河東之三篋盡通辯圓談叢稷下之千人皆  
伏多識前訓鑽之彌堅善與人交久而無改雅奉玄元  
之教妙達養生之旨深通醫砭之術屢獲蠲疴之効其  
風規醞藉學術該博亦足為儒林之丈人公朝之舊德  
矣某昔刊青簡嘗接緒言今志佳城無慙直筆庶幾傳  
信以永方來銘曰

濁河奔流羽蟲日化逝者如斯不舍晝夜新阡鬱起原  
隰龍鱗死而可贖人百其身嗚呼柴公名高鄉品給事  
左曹行將十稔享年從心考終正寢日月之吉龜筮叶  
從牛眠卜宅馬鬣增封九原宿草千古長松唯令名兮  
不滅與簡策兮無窮

宋故推誠翊戴同德功臣山南東道節度管內  
觀察處置橋道等使特進檢校太尉同中書  
門下平章事使持節襄州諸軍事行襄州刺

史判許州軍州事上柱國隴西郡開國公食

邑一萬四百戶食實封三千二百戶贈中書

令謚曰忠武李公墓誌銘序

并

景德元年冬天騎寇邊羽書狎至列城開壘冀方弗寧  
燿火樂照於郊畿虜騎將飲於河曲聖皇赫怒乃議親  
征六師戒嚴百神衛蹕且詔襄陽節度相國李公為駕  
前東面都排陣使元戎十乘實先啓行既至而軍聲震  
且戰而戒渠殲清道迎謁案節前驅及天步底寧鑾輿

凱入又詔公以精甲萬騎留鎮澶淵。粵二年春正月詔公入覲。臨軒延見。體貌非常。置酒高會。勞加等適。終飲至之禮。俄嬰腠理之疾。太醫中貴相望於通莊翠華羽葆。親至於甲第。公力疾迎拜。雪涕興言。發於至誠。感動人主。既而中乾遘沴。有加無瘳。迨於旬時。遂至沈劇。迄二月癸未。以不起聞。皇上撫几興嗟。臨喪出涕。失左右之手奄喪於宗臣。聞鼓鼙之聲。深思於賢帥。搢紳相弔。里巷輶春桃李。無言蓋仁愛之所結。金石斯刺。固風。

烈之如生嗚呼哀哉真人之傑也已公諱繼隆字霸圖  
其先隴西成紀人至於因生命氏之由來世德家風之  
似續實出玄元之後蔚為仙李之宗族望重於山東譜  
牒藏於冊府非假一二而談也公之遠祖占籍上黨水  
深土厚代產偉人大王父諱直以高尚之姿不求人爵  
以蕃衍乏慶大啓孫謀王父諱肇仕後唐為都壕寨使  
檢校司徒同光中討王都於中山會北戎赴援王師失  
律諸帥奔潰不任其恥獨率麾下力戰而歿烈考諱處

耘國初佐命功居第一歷宣徽南北院使樞密副使屬  
太祖皇帝再造區夏經營四方申命信臣討平亂略偏  
師一舉盡得荆山之地不煩血刃無犯秋毫版圖入於  
職方貢賦歸於宰旅大勲既集飛語乃生卒致投杼之  
疑且有傳車之召屬吏問狀恥於辨明左遷淄州刺史  
考終於治所焉太祖念翊贊之元功申追命之殊典特  
贈宣德軍節度使檢校太傅以公之貴累贈中書令追  
封幽王妣吳氏封齊國太夫人王父累贈尚書令祖妣

趙氏累封萊國太夫人皆以公之故也公識度沉粹風  
規醞藉山庭月角蓋有封侯之相蒼璧黃琮乃是禮天  
之寶耿介不羣倜儻自任涉獵經史博通大義馳騁騎  
射冠絕一時初先王是仲三人友悌尤篤而先王以翹  
車應聘杖策從軍仲於己知不遑家食公始在孩稚即  
養於伯父作坊君迨總角成人出就外傳乃歸膝下以  
奉所生蓋閨門之中兒無常父者矣先王居宣猷之任  
公朝行延賞之澤以公補西頭供奉官及侍行淄川爲

當塗者除其籍屬聖人之降生從母氏而入觀命復其  
秩留於京師俄丁先王憂見星而行悲感齊俗遠日之  
卜歸葬洛陽執喪過哀襄事盡禮時公始十有七歲矣  
既畢封樹復預朝請而當時用事者或先王有憾之  
人方徼寵於明庭思敵怨於後嗣公之所厚為公危之  
公介然自持不以屑慮姑務德報且圖智免繇是靡事  
生產多恣弋獵持權者謂其非象賢也勿復忌之甫及  
勝冠之年深達屈身之略事親以孝睦族以仁沈浮當

時脫略細故識者知其遠大也開寶初送戍卒於中山  
中山帥益玄皓命識射堂公矢無虛發舉止嫋雅玄皓  
有知人之鑒謂公曰它日非吾所及也時隴蜀初平寇  
盜猶梗命公為果闖州監軍兼巡檢太夫人以公使於  
遠邦特鍾慈念擇先王之左右常從父故謹厚者俾輔  
翊之公曰兒之是行不須此輩必當有立無忝前人太  
夫人喜聞其言拊背以遺戾止踰月羣偷屏息巨猾就  
擒齊岷安堵椒蘭之德薰於鄰邦金玉之音聞於京轂

受代即路比屋遮號遺愛在人頌聲盈耳公以庭闈在  
念晨夜兼程驛輶奔馳劖棧危險蘿葛蒙密巖谷深峭  
狹逕雨苔之滑喬林宿鳥之喧絕澗崩崖人馬俱墜比  
驛吏然燭而至引綆以登兩無所傷深踰百尺議者以  
公貴盛之未涯孝思之致感也會朝廷將舉樓船之師  
復金陵之地命公率卒三百戍於武岡式遏蠻陬以防  
外侮先是內地但給刀楯羣寇暴集僅及數千公督士  
力疾推鋒決死藥鏃貫臂神色自若賊不敢抗稍自引

退繇是勇敢之譽聞於闕庭及王師南征命公與石曦  
領偏師討平宜春郡捷書上聞吳人褫魄太祖始不以  
衆人遇之也當是時浮梁渡於長江靈旗指於南國內  
發七校日費千金資糧屏屢順流而下牙檣鐵軸敵境  
是虞太祖命公與宗人符恭董其役公備豫有素往來  
無滯縕管斗粟不爽於軍需木牛流馬式彰於心計太  
祖奇其材力形於歎嗟乃命公案視壘垣督責戰具出  
驅使傳車無停輪入奏戎機膝之前席甲戌紀歷知江

左之道消伏波論兵與漢皇而意合自王師南渡公往復其間常日馳五百里途中遇虎以一矢斃之又嘗械降將一人獻於闕下至項縣疾甚斬首以聞太祖謂其勇而有謀可任大事嘗於江中與吳人水戰伏弩忽發正中其額若神物保護終無所傷奮不顧身忠而能力始太祖以先王之捐館也頗深痛惜特優命數若追悔之無及嘉舊勲而不忘疇公之勤益懷遺烈問及孤幼形於軫惻因謂公曰俟平江東之日奉捷書而來時中

使近臣幾十數輩專伺獻功競圖受賞適有機事當奏  
京師公獨請行上益虛佇且言臺城危蹙之狀因云在  
途日忽大風晦暝此城陷之兆詰朝露版至太祖名謂  
之曰如汝料矣吳將盧絳者嘯聚亡賴衆且萬人盜庫  
兵拒王命詔公以偏師討之勢窮乞降縛送行在以功  
遷莊宅副使會雩祀西洛命公為御營前後巡檢使太  
宗踐祚拜六宅使河決近郡奉詔塞之如期訖役水復  
故道三年輿駕薄伐次於常山命公視師晉陽盡護諸

將因受詔與彰德軍節度使李漢瓊當一面之衝施九  
攻之術飛矢羽集而戰氣益酣左輪朱丹而鼓音不息  
撫其不勉奮以先登勇常冠軍退必殿後嘗為機石所  
中勢如疾霆旁觀震驚不挫毛髮俄而并土窮蹙面縛  
出降太宗因其兵鋒遂討幽薊命公與郭守文領期門  
之師當前茅之任與虜鬪於胡瞿河之南大挫其銳會  
戎人救至我師不利倉卒之際即議班旋車駕宵征諸  
將皆去唯公敦陣整旅長驅而歸引弓之民紛布左右

憚其嚴整不敢邊擊追及行在太宗悅之既還上都罪  
狀諸帥唯公與汾陽等數人不坐馬俄而猶狃犯邊命  
公護常山軍與崔翰等大破虜於徐河先是朝廷圖陣  
形規廟勝盡授紀律遙制便宜主帥遵行貴臣督視公  
獨陳應變之略不以新書從事違詔之罪誓獨當之果  
成茂勲天子嘉歎四年遷宮苑使媯州刺史六年護三  
交戍兵又受詔與潘美出代北破契丹靈丘縣大獲而  
歸明年護定州軍雍熙二年李繼遷叛於銀夏受詔與

田仁朗討之仁朗被讒下獄以公為環州團練使實代其任公以仁朗非罪屢上言救之果獲輕典及西師之罷出為萬陽關監軍三年春王師北征諸將受律公隸曹彬麾下實為之前鋒鼓行深入屢敗賊衆矢中左股督戰不廢得契丹貴將一人元戎欲奏其事公力止羣議不敢貪功俄而傳潛米信兵敗衆遂大擾為賊所乘獨公全師而歸成列不亂既次易州賊騎倏至公兵素整格鬪退之因受詔知定州兼兵馬鈐轄太宗知公忠

勇可貞戎政改武州防禦使充侍衛馬軍都虞候賜號  
忠果雄勇功臣九月匈奴南侵命公為滄州部署率步  
騎一萬以赴之虜急擊河間劉廷讓求救於公不俟命  
而往次君子館虜伏兵發廷讓等先不之覺公力戰敗  
之殲戮無數會暮虜援兵至裨將桑贊等先遁我師遂  
潰公獨領百騎達於河間讒人構之謂其失備詔徵赴  
闕送相府簿責之公條對明白即命復位因上軍政數  
事皆可其奏未幾授武州觀察使檢校太保總兵如故

端拱元年春遷洮州保順軍節度使充侍衛馬軍都指揮使出為定州都部署是歲匈奴八萬騎寇中山公之衆纔二萬內謁者傳詔俾堅壁以待之公謂諸將曰聞外之事吾得專之也往年河間為人所誤不即死者正為今日耳護軍袁繼忠壯其言躍馬從之大破虜於唐河追奔數十里俘馘以萬計是歲虜寇常山及邢洺諸郡皆城守不出而中山之民芻蕘無廢公又出奇兵薄西山以邀虜虜亦引避太宗賢之召歸謂曰唯爾盡力

於我每歲防秋即詣屯所淳化四年授邠州靜難軍節  
度使仍總兵柄時李繼遷叛渙河外交通夏臺綏州高  
文峩舉城効順西鄙騷然命公為河西行營都部署繼  
遷間風逃於絕漠保忠就縛送於石州或請誅之公曰  
當獻於天子以釁鼓耳既而申宥罪之命契明主之心  
焉至道二年春繼遷劫我輜重於浦洛河二將敗衄命  
公為靈環十州都部署經略西事秋七月大發車騎十  
餘萬分五路以討賊遣公自靈州取東關鎮由赤檉苦

井路以赴之軍行乏水深以為慮即自橐駕路徑趨烏池聞丁罕慶州之軍與賊接戰倍道赴援解其長圍三路之兵皆後期不至賊黨遠遜遂謀旋師尚以不赴靈州慮違詔旨遣其弟繼和奉表待罪太宗深加慰勉屬饋糧朔方命公由瀚海路率師護送公請自古原州涉蔚茹河為便衆或非之公確論其事又遣繼和入奏繼和亦博達有謀極言其利太宗聽之屬漕運之司飛輓未集遂案甲休士持重養勇賊將吏凡遇者頗擾內屬

率兵擊敗之俘獲萬計士氣益振叛羌悉歸三年果由  
古原州路入授靈武遂城廢壘是為鎮戎軍控夷人之  
咽喉為諸夏之扞蔽守禦之固至今賴焉自靈武之言  
歸間永熙之厭代亟陳封奏求覲天庭改授陳州鎮安  
軍節度使檢校太傅總兵如故五月來朝上以公累朝  
舊臣地居元舅周旋二紀勤勞王家將欲增其寵名不  
敢煩於戎旅詔加同中書門下平章事歸鎮旬服偃息  
以作藩正位中台雍容而論道俯接天邑蓋蒙福於京

師並建戎藩用夾輔於王室屬太宗因山卜宅同軌戒  
期執圭來朝攀髯號慕俄丁齊國太夫人憂居喪盡哀  
幾於滅性明詔起復固讓莫從三年以誕聖之辰修上  
壽之禮郊勞餞飲寵數並優宴見諮詢嘉言罔伏五年  
郊祀進位檢校太尉六年北戎敗我師於望都公感憤  
載懷明發不寐上獎其誠節特詔歸朝清晏延登策慮  
幅臆公車請行封章疊委上優寵耆德不欲重煩但璽  
書垂褒便坐加禮而已俄授公山南東道節度使未幾

受詔判許州實由公乃心本朝忍違京輔遙領峴首式  
綏三楚之人卧理壁田且增九鼎之重遽以明德皇太  
后大漸詔入省之屬玄寢之有期復巾車而肆覲俄而  
北方之彊舉國來寇邊城震駭羽檄交馳兩河之人旦  
暮延頸以溪六龍之御也公懇求扈從以扞牧圉上亦  
傾心委賴動靜諮詢公忠誠感發規猷宏遠公家之事  
知無不為帷幄之籌言皆可復及先驅禦侮受命忘家  
臨敵誓師人百其勇胡騎奄至不介馬而徑馳我武既

揚須破虜而會食大殲醜類克振天聲保界洪河申嚴  
戎政輕裘緩帶奉迎乘輿醴酒椎牛宴犒衛士上天眷  
命北虜請和邊塵載清帝車來復加地進律實居羣后  
之先繼好息民式開萬世之利詔加開府儀同三司增  
邑千戶未及拜命遘茲沉疴適睹承平奄歸窀穸嗚呼  
享年五十有六詔廢朝五日贈中書令上特為制服發  
哀羣臣奉慰命入內內侍副都知西京作坊副使張公  
景宗監護葬事又命殿頭高品石廷福名名德僧就其

第作佛事四十九日而罷太常考行謚曰忠武發引之  
日有司具鼓吹鹵簿大鴻臚持節護喪即以今年十二  
月庚子歸葬於河南府河南縣偏橋村之先塋舉洪農  
郡夫人楊氏祔焉禮也公二紀宿衛四換節旄累階至  
開府策勳上柱國進爵為公真食至三千五百戶功臣  
之號凡三加焉祿位官榮皆人臣之極矣公前娶洪農  
楊氏即保靜軍節度使贈侍中光美之女也繼室天水  
閻氏封涼國夫人三子長曰昭吉次曰昭文皆任供奉

官先公而逝季曰昭慶今任洛苑副使四女長及笄而亡次適內殿崇班曹琰亦逝矣其二皆幼兩弟仲曰繼恂任洛苑使順州刺史不幸短命前公而歿有子曰昭遜以公之故特授內殿崇班季曰繼和任西頭閣門使平州刺史智略輒磊落不羣負文武之才以功名自任公友愛尤異深所推獎嘗謂之曰吾門之不墜者繄爾是賴自罷兵歸鎮因手筆唐李勣遺戒授之且曰吾不復預家事矣啓手之日依而行之及公之被病繼和

適受任并門力疾封章忽死以待飛駟而至相見甚歡  
談笑移晷方寸不亂比更衣而就舍即瞑目以歸全其  
器量也如此長姊適故洛苑副使郭守璘恭惟明德皇  
太后沙麓啓祥塗山叶慶作合先帝正位內朝光輔大  
君居尊長樂播德形管升袞宮實公之元妹也次妹  
適故主客員外郎直集賢院范貽孫從父兄曰繼凝任  
樞密直學士未及大用而亡曰繼昭終於殿直二兄之  
子曰昭度內殿崇班曰承信供奉官皆由公之故也公

器宇宏廓風鑒融朗敦閑詩禮博通義府跌宕文史多  
識前言寤寐經綸善談名理為將威重御衆嚴整在貴  
思降人得其歡心撫下有恩士致其死力習知邊事練  
達武經臨難忘軀無厭於金革盡瘁事國竭力於股肱  
交遊之情歲寒而不改行旅之際險易之不爭嘗奉詔  
書護塞河決日暮涉水讓舟於梁迥公與竇神寶乘單  
舸而渡溺於中流得太桑樹依之獲免及迥以舟迎夜  
半至岸比旦視之樹已沒矣其損已先人有如此者公

臨事有謀當機無滯岐溝之役適有詔部分諸軍隸於  
列郡公遽令錄其詔書後旬餘有亡卒數萬人集於中  
山不知所嚮公即以詔書諭之各給要券俾歸所部其  
深識制變有如此者公為國遠慮獻言盡規先嘗詔廢  
夏州公以為賊遷根本之地不可棄也又言銀夏南山  
中宜增置堡戍以扼其衝且保障蕃族而斷賊之糧道  
當時雖不用其策而識者贊之至於宿衛鈞陳握兵蘭  
錡周廬夜直太上有高枕之安戎壁親巡軍中無兒戲

之謂連守兩鎮密邇王畿化行若神明民愛如父母在  
宛丘日屬水潦暴集舊防壞決吏民奔潰蓋無聊生公  
獨守危堤精意憲禱衝決稍却一郡獲全率身捍患人  
受其賜性敦儉約不務華侈勤接士類雅好清言多聚  
羣書僅餘萬卷退食於公手自刊校喜讀春秋躬親繕  
寫筆札之麗自成一家博物多能動臻奧蹟金絲誤曲  
周郎之顧乃迴駕驥同羣伯樂之鑒殊妙然而感激家  
世慷慨勲名嘗語弟繼和曰我異日當馬革裹屍正得

死所耳慎無厚葬期於速化既以彰盡忠之節亦以見  
達命之言在北邊日嘗奉詔廢威虜軍公上言以寧障  
之設不可撤備汔今賴之又累奉手疏乞固守靈州至  
於陷沒深以為恨此又城郢之英規禦戎之長算也公  
勞謙自處兢持尤甚踐台宰之位也而翼牀好讓慕考  
父之益恭立方面之勲也而坐樹無言同之側之不伐  
冠通侯之籍也而卑以自牧靡恃刑馬之盟居外族之  
親也乃貴而能貧謹守濯龍之戒宜其陟降帝右屏翰

王國出藩入輔生榮死哀清廟歲功鄰侯已居於第一  
未央畫像霍氏當期乎不名茲所謂皇家之盡臣人倫  
之全德也已愛弟等以某嘗學舊史從事斯文見徵篆  
刻之辭以防陵谷之變牢讓不獲謹為之銘銘曰

哲王建官仰鑒懸象紫微端門實列貴相文昌法宮乃  
有上將唯公踐之令問令望國之大事時惟五兵入董  
藩衛朕師不驚出總戎律亂略以清唯公尸之七德以  
貞二矛重弓高牙長戟琿戈淑旛屏我王國弩矢前驅

列鼎而食殊鄰不庭拊劒太息黼黻公衮山玄陸離赤  
鵠几几貂冠蟬綾晝日三接宴見疇咨啓沃忠盡行無  
越思中山之師轍亂旗靡抗章請行投袂而起帝嘉舊  
勲慮其勞止旰食咨嗟爾書褒美控弦之騎飲馬于河  
鑾輶薄伐戰功居多時龍駐蹕天騎請和宣室飲至朔  
陲止戈帝居穆清體貌尤異中外式瞻安危注意事君  
致身憂國盡瘁嗚呼彼蒼胡不然遺心領襄漢鎮茲壁  
田河潤九里民戴二天邑廣千乘祿踰萬錢樂只君子

胡不永年歲將暮兮寒風冽天皚皚兮飛霰雪總帳儼  
兮猶懸靈輶隱兮進轍路悠悠兮野蒼茫歸夜臺兮從  
先王英魂邈兮騎箕尾忠功藹兮書太常泉局闢兮宿  
草荒人生共盡兮吁可傷惟勲名之不滅兮等維嵩之  
峻極與洛水而靈長

武夷新集卷十

欽定四庫全書

武夷新集卷十一

集部

武夷新集卷十一

宋 楊億 撰

墓誌三

三首

宋故推忠協謀佐理功臣金紫光祿大夫行尚  
書吏部侍郎同中書門下平章事監修國史  
上柱國太原郡開國公食邑二千戶食實封  
四百戶贈太傅中書令謚曰文簡畢公墓誌

銘

序

景德二年十月乙酉上御崇政殿丞相太原公早朝方  
候對於殿廬中與同列議所以條奏之事侃侃有若俄  
頃風眩暴作不能入謁上亟令太醫切脈餌以良藥遣  
中貴人絡繹致問良久疾甚殆不知人事上不俟駕躬  
自臨視肩舁歸第即日以不起聞上又親至其居臨哭  
之慟賜白金三百斤詔廢朝五日再贈太傅中書令君  
臣之際斯為至矣哀榮之數亡以加矣公諱士安字舜  
舉其先文王之昭功參於並建魏萬之後兆啓於大名

錫羨流光世德彌劭衣冠閥閱史策相沿蓋為海內之  
名宗無愧山東之著姓公之遠祖占籍於代郡之鴈門  
以財力雄邊敦尚氣節以義方訓子蘊積慶靈至公之  
曾王父宗昱以州里推賢孝廉中選仕至雲州雲中令  
王父球位罔充量仕不越鄉終本州別駕烈考又林以  
廊廟之姿屈於州縣以清白之訓遺於子孫終澶州觀  
城令逮公之光輔大政若將登庸緝熙庶工平章百揆  
天子嘉同德之美尊獎於宰司舉追命之典褒崇於先

正乃詔有司贈公大王父為太子太保曾祖母吳氏追封鄧國太夫人王父太子太傅祖母史氏韓國太夫人烈考太子太師妣樂氏代國太夫人繼母祝氏鄧國太夫人盛德之後垂裕乎百世自天之澤光被於九原蕃衍之祥斯不誣矣公器宇宏廓風規爽邁爰自稚齒逮於成人介然不羣卓爾有立橫經鄉校拳拳服膺視膳庭闈蒸蒸就養公始在襁褓即失所生既罹閔凶鞠於祖母先太師繼室以劉氏祝氏歷事之率禮無違因心

不匱純孝之德士類攸稱勝冠之年纏憂曷怙几筵號  
慕欒棘盡哀既而閱先君手澤之遺文披奕世家藏之  
羣籍念立身揚名之訓思切磋博習之規而澶淵近畿  
逢掖益寡交遊所及孤陋是虞且聞鄭之圃田雅多君子  
因奉祝夫人徙居焉乃得今楊徵君璞工部韓侍郎  
不及故光祿劉少卿錫博約浸潤遂通百家之言直諒  
多聞是為三益之友歲祀永久至業大成從賦春官時  
名籍甚乾德中禮部員外郎知制誥王公祐以名德掌

貢部乃擢公上第焉邠帥楊廷璋備璧馬之聘延置幕  
府贊樽俎之畫允為嘉賓伸於知己盡心所事甫及二  
毛之歲始霑一命之榮除濟州軍事推官時所親李公  
謙浦適牧是郡筦榷之利俾公專掌歲致餘羨民用胥  
悅太祖間其名徵赴闕面授兗州觀察推官太平興國  
初遷大理寺丞兼掌河運方船之粟轉漕攸資九年之  
儲廩庾斯實屬吳越王修乘朝之禮獻益地之圖海隅  
蒼生初被皇化慎束良吏撫綏遠民即以公知臨海郡

事就遷太子左贊善大夫江東諸州都陽為大地征甚  
厚戶籍尤富非有濟時周物之用撥煩治劇之才臨於  
是邦鮮不敗事公自台徙饒踰年報政職務修舉吏民  
便之改殿中丞歸朝為監察御史受詔知乾州公以母  
夫人在喜懼之年有羸老之疾咸秦之地驛置尤賒扶  
侍之官登頓良苦因上言求督汝墳公田以奉甘旨官  
閒務簡遂其所好家貧俸薄不以嬰懷屬太宗皇帝崇  
建戚藩夾輔王室精擇僚佐翊贊親賢即以公為左拾

遺冀王府記室參軍侍從平臺從容朱邸成碣館好賢之美贊東平樂善之風至於曳裾王門仙姿冠玉抽毫容右藻思凌雲獨步一時夐出羣萃藉由畢就轉考功員外郎未幾以本官知制誥藩王以借留為請天子不之許也再歲召入翰林為學士公上言禰廟二名有所嫌避明詔敷諭不容辭職天子嘉得賢之美議者蔚知禮之稱又受詔與蘇易簡同知貢舉是歲郡國貢士以二萬數奏名亦數千人至公無私羣議歸美會郊祀拜

主客郎中學士如故俄授右諫議大夫知潁州屬淫雨  
降灾嘉穀不稔公乞開公廩以振乏絕望賜田租以惠  
疲瘵帝俞其請民實受賜會今上尹正京府寵綏神州  
驛召公為開封府判官未幾肇啓儲闈並設官屬申命  
公兼太子右庶子遷給事中領職如故屬大明繼照蒼  
震丕承拜工部侍郎充樞密直學士兼知開封府事邦  
畿之間實方國之都會輦轂之下蓋獄市之兼容簿書  
期會之煩豪右侵并之弊公擊斷無滯浩穰以清俄抗

封章求解劇任即拜禮部侍郎再入翰林為學士前席虛佇清宴延登動靜諮詢周旋獻納且以禁林書詔之填委周廬宿直之勤勞屢面至尊辭以目疾除兵部侍郎知上黨郡事水深土厚足以養疴尚德興廉於焉靜理神明之化期月有間秩滿徵還以本官充翰林侍讀學士數月兼秘書監金華侍講允謂深嚴秘府刊書是資鴻博論思慎密體溫室之不言學問淹通蘊河東之默識為儒林之領袖實朝右之羽儀然而民望攸歸公

議斯逼累躋鼎席同秉國鈞景德元年七月以公為吏  
部侍郎參知政事踰月以本官平章事監修國史與今  
中書上谷公並命焉是月冬天騎寇邊鑾輿薄伐公以  
美疹之故不果扈從旦夕治療幸其有瘳追及澶淵見  
於行在是時皇上講和戎之利繼好以息民修弭兵之  
盟天旋而飲至公運籌漢幄早啟興邦之言偃伯靈臺  
親逢下武之運同心一德叶贊於欽明夙興夜寐彌綸  
於職業無何腠理生疾賜告家居中人國醫冠蓋相望

公以為三事之任四海具瞻鎮撫外夷將明萬務陟降  
帝右非可以貪榮寘亮天工非可以曠職遂陳手疏願  
解樞軸上特降優詔不允其請申命近臣俾之諭肯丁  
寧備至靡容遜讓公感極以泣疾亦稍平入覲穆清面  
陳至懇上登獎尤異毗倚彌深而公常膳載加自公匪  
懈有犯無隱方宣補袞之勤外強中乾忽起逝川之歎  
梁木斯壞何哲人之云亡同體忽虧實元后之深痛嗚  
呼享年六十有八上特為制服發哀羣臣奉慰追錄嗣

子及於諸孫乃至給使之徵咸蒙甄獎之澤又特命皇  
城使愛州刺史衛公紹欽監護葬事太常考行謚曰文  
簡發引之日有司具鹵簿鼓吹大鴻臚持節護喪即以  
今年正月辛酉歸葬于鄭州管城縣馬亭鄉盧村之南  
原從先太師之塋禮也公積階至金紫策勲上柱國三  
進爵為公加真食之封益功臣之號人爵之盛曷以加  
焉娶東陽駱氏累封陳國夫人出於華宗作合君子享  
是偕老宜其永年二子長曰世長太子中舍裕靈馳稱

道光於濟美次曰慶長大理寺丞聞詩稟訓志聳於象  
賢三女長適故刑部員外郎李象次適進士張扶先公而  
逝次適江州德化簿劉宗誨職方郎中蒙叟之子也二  
孫從善從古俱任將作監主簿雖在羈艸之年並敦孝  
謹之行有後之慶豈誣也哉公通介有常謙卑不伐接  
下和易未嘗輕於匹夫與人久要以是稱為長者居處  
儉約不爽於素風中外踐更克守於清節善談名理聽  
者忘疲多識典故酌之不竭屢掌書命潤色之美居多

亟預疇咨獻替之勤斯至洎入叅大政薦陟中樞年者  
益明人望唯允展四體以率職曾無越思奉三接以矢  
摹於焉盡瘁居位之日尚淺致君之略未伸遽茲歸全  
蓋有遺恨性嗜墳史手不釋卷晚年寫書百卷字皆方  
寸躬自讎對以備觀覽常所著述遺札頗多諸孤等孜  
孜編綴為三十卷垂世不朽其在茲乎某早奉音徽屢  
陪談宴矧又紫垣掌誥聯顏范之官曹黃閣拜塵熟丙  
魏之風采且令嗣之勤請迫玄寢之有期願誌幽扃豈

敢牢讓銘曰

畢氏之先肇基洪源大名啓胄後裔實蕃公之乃祖始居鴈門吏才州縣不違丘樊顯允太師貽謀濟美有志四方考終百里公之既孤不學斯恥徒居圃田鄭多君子杖策從賦登名太常隨牒應聘嘉言孔彰乃督河漕乃佩印章歲滿增秩寘彼周行乃佐戚藩乃司雅誥醞藉風規周旋輔導雍容內庭渙汗大號諫官長人善政云報翼翼京邑巍巍東朝珥筆垂紳是為元僚宥密樞

衡深嚴禁署侍從論思再至迭處上黨之治民惟去思  
宣室之對帝乃疇咨入踐巖廊冠於宰司民具爾瞻百  
工允釐永年未登二暨興沴人之云亡天不憝遺恩極  
臨喪禮優贈襚帝念良臣永懷遺懿野蒼茫兮風颸颸  
馬蕭蕭兮旐悠悠背都城兮遵廣陌遡新阡兮歸故丘  
俯咸洛之大道兮介溱洧之通流嗚呼賢相之墓兮在  
此隴樹拱兮春復秋

大宋贈侍中追封夔王墓誌銘

并序奉

勅譔

昔者周建戚藩重之以執膾之數漢封宗室申之以軟  
血之盟所以隆敷敘之恩崇糾合之義其有炳靈帝胄  
擢秀天枝屬寶歷之肇興顧徽音之早謝友于致美極  
太上之孔懷典章錫命播策書於悠久親親之德厚莫  
重焉王諱光贊順祖惠元皇帝惠明皇后桑氏曾王父  
母也翼祖簡恭皇帝簡穆皇后劉氏王父母也宣祖昭  
武皇帝昭憲皇后杜氏考妣也太祖英武聖文神德皇  
帝太宗神功聖德文武皇帝王之兄也曩者木德下衰

三靈改卜赤符啓運百姓與能厯數有歸謳歌允屬太  
祖皇帝握榮河之祕紀應耀魄之元符受諸夏之樂推  
為生民之司牧帝出於震龍飛在天奄宅中區允升大  
寶卜世三十與成周而比隆執玉萬國無防風之後至  
於是右賢左戚崇德報功諮詢稽古之言講求固本之  
術裂茅土以利建著丹書鐵券之文分寶玉以展親增  
維城磐石之固若乃嗟棟華之早隕慨桐葉之前聞軫  
同氣之深情舉漏泉之茂典於是建隆三年詔皇第五

弟贈侍中追封夔王仍賜今名厚飾終而峻追命也黃  
門監之品秩貂冠蟬綾諸侯王之名數金璽蓋綏泥書  
出於右掖密印貢於九原蓋白水中興演也胙全齊之  
壤黃武建國策也啓長沙之封所以光照大猷發揮遺  
懿憲章前代肇天命於維新光寵公族致民德以歸厚  
丕顯淳耀莫之與京今上紹休繼明奉先追遠念本枝  
之盛永惟叔父之親顧佳城之制當用真王之禮啓新  
阡於畢陌祔玄寢於橋山相善地於牛眠得吉卜於龜

食寃穷之事所以即安鹵簿之儀悉從備物中人尤徒  
而歲役鴻臚持節以護喪先遠戒期哀榮舉集即以景  
德三年十月二十八日歸葬於河南府鞏縣南誓鄉鄧  
封村順也夫志陵谷之變者必傳信之辭形金石之刻  
者乃不朽之事下臣奉詔猥當紀述伏紙流汗愧不能  
文銘曰

皇矣帝胄發源靈長錫羨蕃衍德厚流光嗚呼不淑喪  
我賢王炎靈勃興高穹眷命玄壤封崇綠綿褒贈修睦

興仁簡編輝映帝曰叔父永懷茂親歲月增逝輝光日

新改卜真宅于洛之濱風蕭條兮木葉脫野蒼茫兮班

劖列鷺遜啓兮靜而安薤歌發兮淒以咽國有史兮揚

德音廣有銘兮志徽烈垂萬祀兮千齡飛英聲兮昭晰

大宋故光祿大夫檢校太保左衛上將軍兼御

史大夫上柱國信國公食邑一千戶食實封

二百戶追封周王謚悼獻墓誌銘

并序奉  
勅誤

昔者驛旄之誓示天下以懷柔麟趾之詩明公族之信

厚陶唐之聖華封陳三者之祝太姒之賢大雅垂百斯  
之頌其有分暉帝胄毓德皇闈至性出於自然積慶由  
於錫羨而乃參駕鶴之侶同子晉之上賓標秤象之能  
歎蒼舒之早世惻宸襟於丹極謁休裕於青編嗚呼哀  
哉見之於周王矣王諱玄祐字慶長今上之第二子也  
以至道元年十一月二十四日生於東宮昊穹眷懷承  
華多慶石牆銀榜表天地長男之祥甲觀畫堂處世嫡  
皇孫之貴而王稟溫恭之德挺岐嶷之姿亦既免懷未

嘗好弄雖在稚齒宛如成人雅尚文史尤嗜筆札辯壽  
街之牘精識造微對長安之日神機絕俗八歲制授光  
祿大夫檢校太保左衛上將軍兼御史大夫上柱國信  
國公食邑一千戶食實封二百戶元子比士雖禮經之  
舊章半楚以封實太上之謙德維城之美克茂於本枝  
齒胄之儀未遑於外傳俄遘陰陽之沴遽成膏肓之疹  
日躋厥德冀三善之彌彰天奪之年何九齡之弗祐以  
咸平六年四月二十三日薨於宮中年始九歲靈生鶴

禁悲纏椒掖震宮虛位感極天慈都人罷市痛深行路  
特詔廢朝五日追封周王有司奏謚曰悼獻蓋夏王鍾  
愛玄宗繇是以賜名臨淮早亡世祖不遑於進爵方策  
所紀布於前聞哀榮之數斯為極致先以其年五月十  
有三日權寔於開封府開封縣汴陽鄉之禪惠僧舍即  
以景德三年十月二十八日備鹵簿鼓吹陪葬於永熙  
陵遵吉卜而安壤樹也自初寔及歸葬並詔供備庫副  
使入內內侍副都知張景宗監護焉惟王玉振金相竹

苞松茂荷茲百祿體自九重而明允篤誠英敏聰悟起  
居粗習了無童心被服造次必於儒者奉兩宮之歡愛  
左右咸宜躬三朝之侯問夙夜匪懈及勝衣趨拜胙土  
啓封並建戚藩立愛以固邦本外總宿衛經武以重親  
賢德望彌宣徽猷益盛仁孝愛士將從四人之遊博習  
親師式佇三雍之對無何庭蘭方茂奄至驚秋隙馬靡  
停莫聞留景吳客致問知玉體之不康太史觀文駭前  
星之失色斯蓋天人之合應靈真之降祥暫表瑞於皇

家復收神於太素望恩不已軫漢后之深慈封樹克終  
復橋山之真宅嗚呼佳城一閑夜臺千古拱木合抱悵  
歲月之推移深谷為陵庶文字之傳信臣恭膺明詔獲  
當撰述在昔苴茅錫社常奉行於命書今茲卜兆開阡  
又勒銘於玄寢濡毫感愴誠無媿辭銘曰

皇圖三葉兮邦家會昌錫祚蕃衍兮源發靈長猗蘭積  
慶兮黃離降祥帝錫純嘏兮挺生賢王在傳不勤兮英  
姿聿彰為善最樂兮嘉言載揚天既難諱兮命亦靡常

秀而不實兮今也即亡愁雲繁兮歲將暮清霜凝兮天  
向曙森騎吹兮前引儼芻靈兮先路祔宅兆兮文園愴  
風烟兮翠樹唯青簡兮翠珉垂令名兮終古

述

一首

殤子述

予授室之明年出領縉雲郡下車十月而生一子既三  
月執其左手效而名之曰雲堂雲堂生七月予被召歸  
闕前一月太夫人舉族先歸建安吳興之別墅比璽書

至予亦間道歸拜墳墓雲堂頗能識其父迎門而笑躍  
而就予抱焉家居僅五旬慮稽留詔書遂單車即路凡  
再見朏魄而至京師氣慘慄以變衰歲崢嶸而將晚明  
年春迎板輿自三吳汎九江浮淮沂汴就養於輦轂而  
雲堂始蹕踔能行旦暮嬉戲於太夫人之膝下爰笑爰  
語甚足慰祖母之心涉秋召病命醫視之先是瘍生於  
頰善療者必令外決使毒氣不留臟中醫市井徒也利  
其有瘳亟飲以藥不數日而愈未浹旬病腹痛便利又

呼醫視之醫急以藥止又數日下血復召醫但謾言將  
愈利於受直訖五日有加而無瘳即召他醫醫言疾深  
矣殆不可為也既而疳氣上攻口中齦齶皆創落兩齒  
手足掉舉目眩轉而死噫生於己亥十月之己未死於  
辛丑八月之乙丑凡六百六十七日其賦命也何天促  
之如是哉因念萬物之內最靈者人父子之道斯惟天  
性過猶不及適情之所鍾有而歸無亦理之可遺然高  
堂奪抱孫之慶衰門纏遺體之悲蓋釁積自躬而禍延

於嗣夫子所謂苗而不秀者是之謂乎若其月角對聳  
山庭衍斥眉目疎秀方口大頤必興吾門終能成器其  
在襁褓挺然不羣初生纔滿月方呱呱而泣家人取書  
冊展向之即熟視其文字喜且笑若能識焉未嘗遺便  
溺於席褥上雖夜寒亦展轉而起家有奴產子者亦數  
歲頗無賴雖羣萃中了不怖憚東西跳梁歌吟無度每  
遠見是子必惶懼號泣若無所容家人潛抱令近之必  
大呼殞絕不知其所以然也初疾愈東室中北壁有畫

佛像每過其門必引身入焉視其畫而笑若相對語者乃喜甚儻家人拒之必號哭偃踣如是者三四十往以至於疾甚性不好弄不嗜味不妄言笑太夫人常言吾閨孩孺多矣未有此兒之卓異也豈吾宗之薄祜無復大其門間耶而病夫之不天將遂擠於溝壑耶因念嘗讀金仙子之書了知大雄氏之旨識六塵之妄相見諸行之無常聚沫非可撮摩浮雲倏然變滅輪迴起於愛必斷必除煩惱歸於空何執何著一切虛幻萬化紛綸

又安能觸類增悲緬懷舐犢之愛積毀成疾自貽喪明  
之戚哉予出於儒門沈迷俗諦猶或慕聖人之達節希  
上士之忘情誠知其無可奈何聊以自道耳服名教者  
得毋罪我乎

行狀

二首

故翰林侍讀學士正奉大夫尚書兵部侍郎兼

祕書監上柱國江陵郡開國侯食邑一千三

百戶食實封三百戶賜紫金魚袋贈兵部尚

書楊公行狀

曾祖式皇不仕

祖邵皇不仕

父澄皇累贈禮部侍郎

建州浦城縣乾封鄉長樂里楊徽之字仲

猷年八十

公之先華陰人永嘉之亂流寓江表占籍上饒郡凡十  
餘世唐上元中劉展叛漁吳會騷然公之六代祖遂舉

族避地於建安之吳興因為著姓自高曾以來用財力  
雄於州里唐季俶優乃祖鳩合義旅幾乎千人保境亢  
宗一邑是賴受署義軍指揮使烈考博通文史為鄉黨  
所稱王氏之據有閩隅也物色異人寤寐豪傑首畫奇  
策請見牙門忠懿王竒之即日解褐置之幕府未幾賜  
五品服拜本縣令絃歌之化流於桑梓蕃衍之祥鍾於  
燕翼公即其次子也始在童丱卓然不羣結髮從師刻  
苦為學學羣從兄弟率以豪俠相尚馳騁狗馬被服輕緩

使酒難近結客報仇而公杜門端居偃仰圖籍躬親布素之行深為宗黨所服邑人江文蔚善賦江為能詩公皆延於客館之中伸以師事之禮曾未朞歲與之齊名潯陽廬山學舍甚盛四方髦俊輻輳其間公既終二親之喪即與從父弟叅躡屩擔簾不遠千里亦既至止名聲藹然先生鉅儒咸共歎服凡再罹寒暑其業大成叅適有懷土之心公即遣歸省視墳墓時李氏建國奄有淮淝贊幣不通邊關甚急公不居一國有志四方思樹

勲於中原恥懷安於故土杖策徑去潛伏間行聿來上  
都憩於逆旅適及秋賦假籍河南首冠薦書時譽愈出  
時翰林學士竇公儀樞密直學士王公朴皆負公望為  
一代龍門公徧投以文竇公倒屣相迎王公置書為謝  
待以奇士名動一時明年禮部侍郎劉公溫叟實掌文  
衡擢於殊等同時登第者凡十有六人周世宗申命近  
臣再加考覆唯公及李覃何曠趙鄰幾得預其選是年  
秋授秘書省校書郎集賢校理遷著作郎升朝為右拾

遺皇朝革命以周室舊臣不宜在侍從之列出監唐州  
方城商稅太祖多遣近臣廉訪謠俗使者即公之故舊  
公因言應天順人海內寧一所宜崇儒術以厚民風使  
還具白其語太祖怒以其訛上左遷鳳翔天興令未幾  
又移嘉州峨眉令公文學之外長於吟詠歷宰二邑周  
旋數載凡遊賞宴集良辰美景必有雕章麗句傳誦人  
口或刊於琬琰或被於管弦岐隴巴蜀之間蓋金相而  
玉振矣開寶初復為著作佐郎散民鹽掌倉穀者四五

年僂俛從事曾無慍色未幾知全州屬太宗御極拜左拾遺歸朝遷右補闕及受代歸闕見於內朝太宗顧左右曰朕在藩邸嘗聞其能詩因盡索公生平所著公搜於篋笥凡得數百篇悉以奏御且獻詩稱謝其斷章曰十年流落今何幸叨遇白玉問姓名太宗覽之甚喜和以賜之自是黃屋間宴翠華遊豫宸章煥發天言下布宣示近臣之外必以別本賜公瓊蘊瑤編充盈篋笥未幾拜侍御史歷庫部員外郎賜金紫受詔與諸公編文

苑英華一千卷皆前賢之詞賦詩筆分別部類揀求菁  
英先朝以公專精風騷特命編詩為二百卷公孜孜採  
掇矻矻服勤非風雅之言未嘗取也遷刑部兵部二郎  
中同知京朝官考課端拱初拜左諫議大夫明年知許  
州公久奉外朝不樂吏役許昌地接京輔當四通五達  
之郊郵傳交馳冠蓋相望公勵精為治盡公無私餞勞  
之勤日不暇給纔二歲受代西歸太宗召升殿慰勞數  
四即以本官判史館事中謝日上顧侍臣曰楊某儒雅

之士置於館殿正得其宜矣數日加史館修撰仍判館事會張洎以翰林學士判史館即以公判集賢院時劉昌言掌機務張洎在翰林昌言固恩寵洎希進用有以公常評議二人者語於昌言昌言又以語洎因共誣公以飛語中傷近臣聞於上上惡之不復問狀即以公檢校右散騎常侍充山南東道節度行軍司馬未行改鎮安軍行軍司馬數月以今上出領京邑慎擇府僚驛召公拜左諫議大夫與今兵部侍郎畢公士安同授開封

府判官明年肇建承華分置衆職以公兼太子左庶子  
判官如故進位給事中上即位拜工部侍郎充樞密直  
學士咸平初轉禮部侍郎學士如故俄以衰疾求解近  
職拜兵部侍郎兼祕書監數月上優獎耆德圖任舊人  
且欲親近老成講論經義遂詔置翰林侍讀侍講學士  
以公為翰林侍讀學士祕書監如故與戶部侍郎夏侯  
公嶠國子祭酒邢公昺工部郎中呂公文仲並命焉公  
侍講金華分直麟閣執經待問前席疇咨上從容言天

下事甚衆借筋之畫莫非沃心更僕之談或至移晷然  
奏稟多削溫樹不言其慎密也如此俄以足疾請告太  
醫診視中使勞問上自取名藥封以賜之適會郊禋不  
及扈從上特命加錫如侍祠之例鑾輿北幸力疾辭於  
苑中涕泗沾襟備述忠懇上謂之曰卿勉進醫藥當不  
及相見及駐蹕大名特降手詔存問公每上表疏皆自  
為之三年正月二十二日車駕還都上特遣中貴人慰  
諭即日疾遂革二十三日以不起聞上軫悼者久之詔

贈兵部尚書降內司賓至其第以錢五十萬絹五百疋  
賜其家仍命中使監護喪事緣葬所須並從官給以其  
子婿太常丞宋臯直集賢院外孫宋綬為太常寺太祝  
纔十歲姪孫偃集皆同學究出身獎舊臣而示優典也  
公先娶王氏生宋氏女後娶王氏封太原郡君公天性  
純懿無有矯飾履行端謹未嘗放佚以儉約自律奉養  
甚薄以名教為務顛沛不違接士以謙卑檢身以清白  
好談名理多識典故自唐朝以來士族人物風流雅俗

悉能記之疊疊可聽素好吟咏遂臻其極每對客論詩  
終日不倦此所以垂名亦幾乎成癖也崇奉釋典酷信  
因果每五鼓即起盥漱誦金剛經如是者三十年未嘗  
暫廢所誦亦十數萬過矣公無男子亦不養子姓為嗣  
琴書素業並以付外孫焉公自結髮筮仕彫纓登朝中  
外薦更夷險一致精力極思能成其名勞形嗇神用躋  
乎壽夫子所謂善人吾不得而見之矣又云未見好學  
者也公之謂歟其餘十年在官徐防無過一裘不易晏

子能負周旋累朝名節保於終始遭遇明主存歿極於  
哀榮亦人倫之羽儀士類之標準也紀述之際有直筆  
在焉聊敍遺芬以咨史氏謹狀

故太中大夫行給事中上柱國臨汾郡開國侯  
食邑一千二百戶賜紫金魚袋柴公行狀

曾祖丕皇任廬州別駕

祖肅皇贈太子右贊善大夫

考自牧皇任尚書兵部員外郎累贈禮

部侍郎

曹州濟陰縣沛郡鄉崇儒里些成務字寶臣

年七十一

公之先平陽人由高曾已來占籍濟陰因而土著遂為  
著姓先大夫以文行首出一上登進士科歷佐使府終  
於郎署公爰在童幼發言成章總角之年出就外傳橫  
經學問迥如宿習秉筆屬文動偕作者甫及冠歲志業  
大成尚復藏器待伸養勇俟闢迹誓得當世儒學宗匠為

門下生乾德中禮部員外郎知制誥王公祜受詔典禮  
部公即踊躍從賦王公覽其文而奇之擢冠多士朝論  
翕然有得人之美解褐峽州軍事推官秩滿為曹單觀  
察府中從事所知論薦改大理寺丞監潭州茶場筦榷  
之利頗致增羨幹蠱之譽揚於王庭擢授太常丞峽路  
轉運副使賜五品服遷監察御史知果州轉殿中知蘇  
州滿歲移充兩浙轉運使改戶部員外郎直史館賜服  
金紫除本曹郎中充三司戶部判官太宗皇帝講求化

源疇咨典故且以列卿之職實惟古官各有攸司所掌  
甚重爰自唐室以臺閣相高汔至於今日為散地由郎  
署而授者例同左遷濬發德音丕變頽俗乃選尚書諸  
曹正郎有才望者凡十人次補諸寺少卿監仍著令自  
今非曾歷少列不得擬給舍諫議公首預茲選拜光祿  
少卿辰韓之墟稱藩海外屬有恩詔慎求使材命公為  
高麗國信使公雍容儒雅博聞強記衣冠之國文物盛  
焉舉措話言是法是倣皇華之美至今稱之復命為京

東水陸轉運使召入拜司封郎中知制誥遷左諫議大夫出知河中府得脫戶八百家附於版籍今上踐祚拜給事中知梓州歸朝受詔同修太宗實錄十月而畢勞賜策勲寵數優渥未幾以本官知揚州入判尚書刑部小吏干犯怒而笞之詣闕訴冤朝官問狀公以爲扶一胥而被劾何面目復據堂決事耶即上章解職以本官奉朝請至是考終於正寢遺奏以六歲孤兒為言上憫之特授太常寺奉禮郎命賦以祿俾終喪紀公始娶趙

氏故宗正少卿齊之女也後娶張氏今夫人李氏封贊  
皇縣君故水部員外郎峩之女也實有令德洽於宗姻  
公三娶良家晚有兒息行年六十有六始得今奉禮焉  
公好學多能博物稽古始在貢部為時間人奮藻屬詞  
流輩推服或有所述作必傳寫都下終以才望入司訓  
誥發揮帝命頗為稱職而襟懷夷坦無有城府音容和  
粹煦如陽春善與人交久彌篤也好治家事勤不匱也  
善談名理口無擇言廣聚墳史手不釋卷雅性奉道徧

閱金簡玉笈之文平生多病深求惡石青囊之術恬淡  
以養性蔓衍以窮年其風規醞藉閥閱深厚亦足以為  
儒林丈人矣記事之職良史在焉謹書世家以告冊府  
謹狀

武夷新集卷十一

謹案卷十第四頁前一行水潦僅止按僅字疑訛

第七頁後八行陟降盡室按盡室二字疑訛

第十六頁前六行即養于伯父作坊君原本父訛

文據宋史改

第十六頁後四行而當時用事之者按別本無之  
字

第二十二頁前一行授邠州靜難軍節度使原本


靜訛靖據宋史改

卷十一第四頁前三行公自台徙饒原本徒訛提

據別本改

第九頁前七行龍樹拱兮春復秋原本龍訛龐據  
別本改





總校官庶吉士臣張能照  
校對官編修臣閔惇大  
謄錄監生臣鄭遇亨

欽定四庫全書叢要

集部

武夷新集卷十四

二至四

詳校官助教臣常循



欽定四庫全書叢要卷一萬四千一百六十七

集部

武夷新集卷十二

宋楊億撰

策問十首

咸平四年四月試賢良方正科策二道奉勅撰  
朕聞古先哲王疆治天下親附萬民必先務農然後足  
食故堯命四岳謹於授時禹別九州先於平土以地著  
為本故建步立畝克正經界之規以生齒為限故受田  
歸田式優筋力之禮繇是穡人狎野品物嘉生悉闢汙

萊且無曠土雖有水旱不為凶年然後禮讓興行風俗歸厚勸功樂事靡遷其心既庶而富爰服於教此聖王域民之要道也自周行井田是為王制秦改阡陌乃成霸業漢抑末而敦本衣食滋殖魏屯田而積穀軍國富饒中代已還人散久矣我國家屢下寬大之詔深懲游惰之民關市之征舟車皆算恐其騁於末游天災流行田租盡免慮其去於南畝廣行勸誘之術俾臻仁壽之域而廩庾之積未至陳陳相因流亡之人猶復稍稍而

出鄰國振業之不暇憂強倍稱而益滋未能小康乃至  
重困矧又西北寇孽作梗二邊飛輓供須靡有虛日千  
金之費尚煩於經度九年之儲何致於紅腐今欲復成  
周之法即表畧素定恐至擾人遵商君之術即貧富不  
均無以復古用李悝之平糴即頭會箕歛出於無名行  
夷吾之寓令即賦車籍馬適增重擾舉趙過代田之策  
即民服先疇既難變業專壽昌常平之議即市有二價  
罔或樂輸但賞罰以粟即贖罪失於不經賣官致於虛

授若耕戰備寇即隴畝非可使卒塞垣難以安民子大  
夫明識經邦強學待問多識前訓博極羣書宜考歷代  
之是非以定當今之用捨強兵富國何者當行嘉謀嘉  
猷虛懷以待

又

問古者鄉老獻賢能之書登于天府樂正論造士之秀  
揚于王庭或以事以言以才以德先選於州里然服於  
官常其後下三適之詔聿明賞典乘一封之傳令與計

借或以戶口為差或以年齒為限經學章奏用別於文  
儒力田孝廉益增於科目或但取世胄或專引孤平以  
王戎之清通猶有門調戶選之謗以宣父之仁聖尚聞  
以貌以言之失自隋設進士唐氏遵行山東士人以不  
踐為恥朝廷卿相率由此而陞笑窮經白首之徒專篆  
刻雕蟲之巧婉媚綺錯既事於詞華敷樸遜讓固求於  
行實流蕩忘返浸染成風故玄宗臨朝深歎於薄俗楊  
綰建議願復於明經雖不果行甚為嘉論然而沿襲已

久改易為難儻舉選復行於州間即人物之評未能折衷科級專求於經術即章句之學非可適時各舉所知乃有比周之黨陳牒自薦寧獲貞退之賢必取乎文質俱全更傷於求備但委乎郡國搜訪亦慮於遺才至如限之以年即顏回子竒豈須強仕計之以口即八龍三虎何必異鄉但取乎文華即組繡輦悅徒為富艷唯務於學業即腐爛脣齒彌益迂疎國家官倍夏商地廣唐漢吏員萬數皆須得人百里一賢將何充選備陳歷代

之略以副仄席之心用期酌中朕將親覽

咸平四年八月試賢良方正策一道奉勅撰

皇帝若曰朕祗若元符為人司牧昧旦不顯虔恭寅畏懼德之弗類慮政之未孚蓋念昔者周命百官皆箴王闕漢設三道用求直言誕舉舊章思聞讜議茲予大夫逢時奮庸有犯無隱之秋也夫五材並陳去兵未可八年具舉足食是先今國家北扞林胡西禦黨項歲遣介士以防盛秋弛邊備即越軼之是虞窮兵鋒又徵發之

為擾堅壁覬寇固役車之未休繼好息民復文告之靡及故烝庶不得安堵弓矢無由載橐至如人獲四脯之餘始免艱食國有九年之蓄乃為太平今曠土尚多游手未復勸課之道非不至賦斂之數無所加萬鍾之藏蔑聞於都鄙一穀不熟遂抵於流亡今欲倍算舟車且驅之未盡歸而貿遷斯壅給復租稅又惠之未及富而經費不充復常平之倉即市井之價或有二修平土之法即經界之制未可行自非時和而年豐不免困窮而

轉徙又如總領衆職莫急於求賢審官申嚴百刑莫先  
於明罰飭法今疆宇遼夐吏員衆多必得其材然付以  
任故文王之德在於能官人東漢之隆本於責吏事今  
但委有司之考課亦第閥閱之末精只遣使者之察廉  
又飾厨傳而為患漢武之欲除吏田蚡非可擅權德宗  
之擇縣令柳渾譏其失體遵荀勗省官之議即員難減  
者實多體薛宣換縣之規即才適用者殊少雖循名  
責實之斯切而政平訟息之未臻至若金科玉條竹書

丹筆以禁多辟所期無刑其屬三千蓋防於踰矩斷獄  
四百用冀於勝殘雖然慕陶唐之畫冠且免而無恥體  
漢初之疎綱又姦乃益生必待臯陶作士師法寧可廢  
豈須定國為廷尉民乃不寃俟論報即久繫是虞但責  
成即舞文斯衆苟四目之罔及乃一人之向隅或罹非  
辜足傷和氣子大夫策慮幅臆智略輒湊兵者凶器必  
可使歸馬放牛食為民天必能致家給人足攷建官之  
意當俾百工之允釐稽立辟之由期措五刑而不用並

揣歷代之略兼陳方今之宜揚搉而言朕當親覽

咸平五年九月試武舉人策一道奉旨撰試武

舉人王闢

皇帝若曰夫五材並用誰能去兵七德孔修於焉右武  
故軒轅受符於玄女所以興涿鹿之征呂望釣璜於磻  
溪所以著金匱之法歷代之簡編咸備先民之軌迹具  
存孫吳著書首標奇正之說衛霍為將但問方略何如  
然述兵法者實祖於斯人稱天幸者亦聞於前史得失

安取是非焉從至如魏武之善用兵亦以新舊從事孔明之能勝敵乃云節制之師葛亮斯有準繩何一時應變之寡術孟德出於胸臆何諸將違律者喪軍豈師古有膠柱之嫌臨機有脫免之急沿襲不同於前代弛張固在於隨時當舉要而劇談庶聞義而斯服今國家尚勤戎略式厲師貞所以威制羌夷保障生聚而黨項狂寇猶假息於朝晡葷狁殘妖頗肆毒於邊鄙調民轉餉遣戍防秋內費資儲外勤征役未能梟取虜首懸於橐

街縛致胡鶴獻于清廟茲朝廷旰食之為念謀夫高枕  
之未遑子大夫識擒縱之方練攻取之策五餌係虜賈  
誼之言可徵三章議邊晁錯之謀斯在敷詩閱禮何以  
得文武之全才籍馬賦車何以致兵農之一混約齋深  
入何以登瀚海而勒燕然保塞折衝何以按榆谿而清  
薊北伐蠻夷者豈煩中國形勢如何得地利者不如人  
和勝負安取參以前志舉爾所知講求便宜敷陳指要  
庶披確論用達善經

試草澤柳察策二道

問王者專山澤之征實惟周制縣官設鹽鐵之禁蓋自漢朝所以牢籠貨財抑奪豪右從來久矣何莫由斯國家奄有寰區外制夷狄用度斯廣經費實繁東南之邦茗卉攸產池海之利鹹鹺是資筦榷之法載嚴律令之文具備設憲網而雖密投罪罟者彌多蓋衣食之所由縱水火而必蹈今欲盡弛其禁即九年之計不充習以為常即五刑之用未措子大夫深達治體必切事情幸

揣當今之宜別陳經久之略

又

問國家並建庶官分領衆職守宰之任風化出焉故大邑庇身子產徵於引喻惟良共理漢宣發於歎嗟今土宇混同郡邑紛布版圖袤溢吏員衆多守土之臣多輒於臺閣字人之長咸調於銓衡皆程其器能校其閭閻因清閒之宴必敷納以言虛己疇咨曾旰食而忘倦懸爵懋賞俟朞月之有成雖慎簡惟勤而頌聲未洽或驅

雞之無狀或治庖之不能或貪墨以敗官或嚴殘而剥下愷悌之化斯鬱循良之稱鮮聞至於分遣察廉飾厨傳者率邀善與專考科第拘殿最者多失鉅賢詔公卿各舉所知或稱匪其人恩移於下俾牧守自署其屬即愛不吾叛用必以私益知審官之難矧復長人之寄予大夫博探載籍深究政經當述選賢任能之方且明興化致治之本條對所問揚榷而言必考古以驗今庶可行而不悖

景德二年三月試草澤劉牧策二道奉旨撰

問化成之道儒術為先故大學之興存於周禮博士之設始於秦官歷代相沿舊章咸在國家盛膠庠之制崇俊造之科鏤版以廣聖言祭菜以嚴祀典傳經請益必選碩儒講肆胄筵咸稽古訓而公卿之子弟鮮隸籍於成均州里之俊髦率登名於鄉老豈勸誘之未至將沿襲之或殊何以復杏壇槐市之規遵小成大成之制弦歌不輟誕揚洙泗之風生徒寢多克追漢唐之盛願聞

嘉話用洽永圖

又

問古者井田之設兵農混焉居常力耕不離於畊畝有事調發爰執於干戈蓋三代之舊章歷戰國而無改施及秦漢沿襲漸殊京師建南北之軍郡國有材官騎士內增七校外置樓船自是已來不能復古而況五材並用誰能去兵天下雖安未可忘戰今國家勤修武備式遏外虞所以保障黎元震耀威德將何以追司馬六軍

之制遵提封百萬之規免飛芻輓粟之勞成家給人足  
之美寓令於疆畔其術如何講事於蒐苗厥旨安在願  
聞婉畫以闡大猷

試草澤策一道

景德二年三月二日

問四民並設益務稽之尤先九序惟歌實豐財而為急  
國家富有區夏勤恤黎元訓兵以備不虞建官以熙庶  
績乃至宗廟賓客之費名田奉邑之資歲計所叢國用  
尤廣雖復頒行恩詔敦勸農功奉順天時聿修稼政罷

不急之務去冗食之兵裁減賜予之規斥棄奇巧之玩  
敦本節用斯為至矣而九年之蓄物力未完一穀不登  
流亡乃出將何以致汙萊盡闢游惰悉歸足衣食而知  
禮文值凶荒而無菜色又何以致太倉之粟陳陳相因  
上林之錢往往而是然後家給人足頌聲浹於連薨國  
富兵強天威震乎殊俗子大夫博通載籍練達政經必  
有嘉謀悉以條對

景德三年九月試賢良方正能直言極諫科策

一道奉勅撰

皇帝若曰我國家奄宅中土勤恤庶邦念前代求賢之勞思昔王好問之裕濬發明詔詳延俊民樂聞讜言用裨至化茲予大夫韞櫝待價藏器俟時射隼有功逆鱗無忌之際也方今邊候徹警戎索載清與民息肩爰戢不祥之器為國上事深戒守方之臣蓋已卧鼓滅烽賣劍買犢下勸農之詔勗游惰以反耕置常平之倉謹豐凶而平糴勸課之道斯至備豫之術具頒而流庸未盡

歸汙萊未盡闢陳陳之粟尚鬱京坻之謠蚩蚩之氓競  
逐錐刀之末倚市門者鄙於刺綉為馬醫者至於擊鍾  
使寒耕熟耘之民有粗衣菲食之歎厚生敦本何以盡  
驅於力田既富而教何以一變而至道若夫慎重名器  
先儒之格訓辯論官材為邦之令典著位峻於堂陛効  
用適於輪轅固亦周爰咨諫宴見敷納徵保任於公舉  
觀試可於吏能黜陟幽明稽有虞之彝制綜核名實遵  
漢宣之故事其有尤異之課即申以增秩之文若乃非

常之才必待以不次之位我有好爵茲用縻賢國無敗  
官於焉致治而庶尹卿士郡邑牧宰暨於黃綬一命青  
綸半通雖有司殿最之申嚴外臺刺舉之詳察尚或貪  
墨以獲戾罷輶而廢職徇公者傷於苛刻賈譽者病於  
脂韋致有嚚訟升聞煩輶車之案劾具獄來奏上丹筆  
之科條但採於風謠或察廉之失實專取於課第亦茂  
異之見遺將何以致棫樸之詠興蒲盧之政治授方任  
能之道著亮采惠疇之業昭巍巍大朝有官人之盛濟

濟多士無彼其之譏子大夫強學多聞稽古博識究歷代之損益明當今之利病所宜窮斯民雅俗之弊極談恥格之方考庶官治亂之由深陳用人之術遲聞嘉話以闡大猷當悉乃心勿有所隱

表狀一

知處州謝到任表

臣某言臣昨奉勅差知處州軍州事已於今月三日赴本任訖遠辭螭陛權剖使符百城之任既優五綵之榮

斯極臣某中謝臣早自孤平獲逢開泰徒以雕蟲之伎  
遂塵汗簡之司皇帝陛下寅奉宗祧旁求俊乂謂臣處  
於羣萃竊畫餅之名知臣恥於進趨挺素絲之節度越  
倫輩超踐掖垣復誤賜於選掄獲同司於筆削家徒四  
壁貧方甚於臨邛字賞千金書未懸於秦市特推恩於  
陋巷俾將命於列藩既克就於國書又驟加於勲籍未  
出瀛洲之署尚參文石之班蓋以臣早奉庭闈久栖輦  
轂離邦寢遠懷土滋深烏鳥之情實巢南之是切芻蕘

之懇須伏閣以自陳封章纔贖於冕旒俞詔已頒於蓬  
草幸一麾之甚便復再疏以請行陛下察以寸心恕其  
九死許扶攜於老幼令密邇於鄉閭況浙右奧區縉雲  
善地閭閻蕃庶土壤膏腴聲教所覃俗知禮讓耕桑甚  
廣民少惰游今歲雖罹旱暵之災尚多溉灌之利人無  
菜色畝有餘糧屬隣郡之不登故穀糴之微貴提封之  
內安堵如常前春已來不至乏絕一境偶無於疲瘵九  
重望減於焦勞臣謹當恭守詔條恪居官次袴襦報政

豈暮月之敢期冰蘖檢身固生平之所履儻渝素守是  
速靈誅臣又念朝辭日得面聖顏親承睿旨以俯隣於  
桑梓又獲奉於甘旨推從欲之仁廣聽卑之造特許終  
於考秩且未議於替移即臣舉族知歸殺身莫報況丘  
園甚近雞犬相聞鄉里親姻或諧於聚首弟妹婚嫁免  
至於失時上以慰慈母之心次以了私門之事而臣齒  
髮方盛驚塞未衰抱繫懷鉛終預諸儒之末摩頂至踵  
須酬萬乘之知冒昧上言隕越無措臣無任云云

謝賜厯日表

臣某言今月日本州進奏院遞到宣頭一道賜臣咸平  
二年乾元具注厯一卷者夏正肇建堯厯爰頒克授人  
時不迷帝力臣中謝伏以皇帝陛下端拱穆清茂育羣  
品德合天地信及豚魚象魏懸書定一王之法制靈臺  
治厯究三統之指歸濬發宸襟載稽古訓將欲納民軌  
物致俗胥庭俾雩祀靡愆無水旱之作沴農夫既正免  
耕稼之失時顧茲遐僻之邦亦荷頒宣之寵七月流火

見司歷之無差五星連珠與太初而相應臣謬膺朝寄  
獲布郡條發函徒切於凌兢測管豈知於疏密謹當虔  
遵時令恪舉官常彌堅夙夜之誠上答照臨之惠臣無  
任

賀再熟稻表

臣某言據本州麗水等縣狀申今年人戶所種早稻自  
秋初刈後為雨水調適元根再發青苗結實成熟共得  
兩收已具州司別狀聞奏者多稼並熟所謂有年嘉穀

再登斯為上瑞臣某中謝臣聞昔者后稷之功既著一  
稃二米顯其祥成周之道方隆異畝同穎昭其應貢交  
阤者曾聞於再熟取甫田者爰及於十千蓋以玄德升  
聞至誠昭格天地訴合百嘉由是而生風雨弗迷三時  
以之無害允鍾上聖克協靈符竊以山越之鄉多乏膏  
腴之產火耕水耨獲地利以甚微食稻與魚習土風而  
惟舊去歲因罹於小歉今春遂至於荐飢力穡雖勤餒  
糧殆絕參以五種之利救其一餉之艱俯及秋成僅無

菜色皇帝陛下乃眷東顧陰隲下民臨遣使臣循行縣道慮賦輿之不集盡賜田租念飢饉之可哀大發倉粟城邑聚人之地為設淖糜山川血食之神必祈膏澤道路之愆敷者貸其枯木之斃溝隍之填委者推以掩骼之仁明詔誕敷和氣斯應如臣所領之郡近接海隅一千里之封陲三萬家之生聚自蠶事載飭厥篚之獲頗多及麥秋俯臨兩岐之謠斯洽菽粟流行黍稷豐穰絕無螟螣之災率有鍾釜之蓄矧早稻既穫陳根尚存大

雨時行土膏脈起芃芃發秀薿薿垂芒同枯楊之再生  
無靡草之先死結實棲歛穢盈車至於晚因又收數  
倍遺秉滯穗既寡婦之是資千倉萬箱顧老農而何幸  
臣忝膺郡寄獲覩年豐親逢五穀之祥同賴一人之慶  
周原膾膾猶詠曾孫之詩堯民熙熙敢迷上帝之力休  
徵斯在純錫昭然伏望宣付史官書之簡策于冒宸宸  
彌切兢惶

賀高陽關路破賊表

臣某言得進奏院報前月二十四日鎮定高陽關馬步軍都部署傅潛等差待禁郭筠齎到狀奏稱九月十七日先鋒使田紹斌差人報楊嗣石普殺下蕃賊二千餘人斫到賊頭五百个奪到馬五百匹衣甲器械不少者眷爾兇渠敢犯邊境靈誅所及醜類以殲克傳三捷之音實賴一人之慶臣某中謝臣聞疆場之事用備不虞金革之興蓋非獲已而況並建萬國守在四夷崇山之阿或蟻壤之斯滿隆車之轍猶螳臂之敢張舞干雖示

於懷悚祝網豈容於越逸是用西藩命將北落徵師授以廟謀翼行天討兵鋒未接豺狼尚肆於無厭湯沐既陳畿甿果聞於相弔渠魁折北餘黨膏原斬馘擒俘已倍雲中之級投戈棄甲更齊熊耳之山獲冀馬以谷量表王師於兩沛此蓋皇帝陛下道符天錫化比神馳樽俎折衝懸知於千里邊陲息警將自於一戎佇收督亢之圖便勒燕然之石克清朔漠永洽承平臣忝備諫垣遠分憂寄明庭獻捷阻聞振凱之音宣室策勲不在稱

觴之列歌時戀聖倍萬常情臣無任歡欣激切

賀冊尊號表

臣某言今月二十四日得進奏院狀報前月七日百官  
於乾元殿奉冊尊號者嚴祀式陳鴻名肇建含靈悅豫  
盛禮便蕃臣某中謝臣聞山嶽配天亦擅崇高之美坤  
元載物爰彰博厚之稱垂世作程所以強名於四大稽  
古建號蓋用比德於九皇在衆美之所歸雖上聖而奚  
讓伏以崇文廣武聖明仁孝皇帝陛下誕膺眷命光宅

中區執左契以御民張四維而化俗齋居決事聿彰欽  
恤之仁旰日臨朝用示躬親之旨羣生成遂庶績其凝  
體唐堯之文思光被四表恢商湯之武烈底定萬方化  
馳若神高陽之稟聖德臨下有赫文王之服大明兼漢  
祖之寬仁挺重華之篤孝總帝皇之能事揜天地之全  
功惠澤及於昆蟲湛露淪於骨髓六龍出震瞻之者豈  
可階升百谷朝宗就之者或思蠭酌於是邦君庶尹國  
老諸生橐街蕃酋比屋黔庶共薦厖鴻之號仰酬煦嫗

之仁扣閭闈之九重集緇玄之萬計至于懇禱始奉允  
俞有司虔舉於舊章率土願聞於大號乃以仲冬至日  
合祭圓丘禮行於郊百神以之述職飲至于寢羣后由  
是在庭端拱穆清祇受典冊祥光休氣充塞於寰瀛歡  
謠頌聲傳聞於行路足以昭祖宗之謨訓聳夷裔之威  
懷人神之望允諧祝史之辭無媿五讓而受謙光之德  
已隆九名聿彰覆燾之功彌廣臣側聞國慶限守詔條  
魏闕存心徒結雲天之戀虞庭率舞莫陪飛走之餘抃

蹻之誠實萬常品臣無任歡呼抃蹻激切屏營之至

謝加勲表

臣某言今月二十五日進奏院遞到官告一通勅牒一道蒙恩加上騎都尉餘如故仍放朝謝者在宥之恩方  
覃於率土冊勲之典俄及於具僚祗荷寵靈伏增悚惕  
臣某中謝伏以唐制勲官十有二等克遵班爵之序備  
存律令之文所以褒賞忠勞甄明品秩不稱其職羊胃  
之謗乃興或曠厥官鶡翼之譏斯起如臣者謬塵祿位

蔑著聲猷東帶立朝已媿諍臣之任一麾出守猥慙循  
吏之稱屬燔柴薦鬯之辰無除地給新之効爰因大慶  
亦被鴻私諫垣未削於姓名勲籍驟遷於等級天威所  
及蓋咫尺之不違官箴有常但顛沛而於是彌勤職守  
用報寵光仰荷天慈臣無任云云

駕幸河北起居表

臣某言今月八日得進奏院狀報去年十二月三日御  
札取五日車駕暫幸河北者毛毳幕稽誅鑾輿順動羽衛

方離於象魏天威已震於龍荒慰邊甿奚后之心增壯士平戎之氣臣某中謝臣聞涿鹿之野軒皇所以親征單于之臺漢帝因之耀武用殲夷於悍族遂底定於邊陲五材並陳蓋去兵之末可六龍時邁固犯順以必誅矧朔漠偏隅羶裘羣類敢因膠折之候輒為鳥舉之謀固已命將出師擒俘獻馘雖奪名王之帳未焚老子之庭是用親御戎車躬行天討勞軍細柳之壁巡狩常山之陽師人多寒感恩而皆同挾礪匈奴未滅受命而孰

不忘家行當肅靜塞垣削平東落皇冒頓之首收督亢  
之圖使遼陽八州之民得聞聲教榆關千里之地盡入  
提封蛇豕之穴悉除干戈之事永戢然後登臨瀚海刻  
石以銘功陟降云亭泥金而展禮逮追八九之跡永垂  
億萬之年臣忝守方州莫參法從空勵請纓之志慙無  
扈蹕之勞唯聆三捷之音遠同百獸之舞臣無任云云

謝賜厯日表

臣某言今月十四日本州進奏院遞到宣頭一道賜臣

咸平三年乾元具注厯一卷者厯象之設克謹於民時  
正朔所頒俾知於天道臣某中謝竊以少昊獲鳳鳥之  
瑞因以建官陶虞有蓂莢之祥由之紀厯所以定分至  
啓閉之候辨躔次弦望之差作事厚生制民命而斯在  
歸餘舉正察時變以可知崇文廣武聖明仁孝皇帝陛下  
欽奉不圖祗膺眷命聿遵前典不廢舊章疇人之職  
既修天吏之功靡忒清臺肇建校諸家之否臧大衍克  
成正千載之謠謬豈期僻陋亦荷頒宣敢不虔奉王正

率循時令土膏纔起便候於農祥玉燭既和永躋於壽域粗識閏餘之數免貽瞽循之譏仰戴宸慈臣無任兢惶激切之至

謝賜衣表

臣某言今月十六日翰林藝學郊俊至伏蒙聖慈賜臣勅書一道紫綺純綿旋襯一領并賜屯駐本城諸軍員僚初冬衣襖者解衣之賜猥及於下臣挾纊之仁更均於列校光生郡邸喜動轅門臣某中謝伏以崇文廣武

聖明仁孝皇帝陛下誕膺元符恭臨大寶惠必先於逮  
下志惟在於愛人鳥獸毳毛俯及嚴凝之候衣裳在笥  
爰推賜予之恩在渙汗之所沾雖容光而必照如臣者  
任叨符竹地僻甌吳奉漢詔之六條方深祗畏分齊官  
之三服忽荷頒宣纂組極於纖華純綿加於麗密璽書  
下降竊窺雲漢之文駟騎來臨更重皇華之命但曳婁  
而增惕實被服以難勝矧於戎行亦膺天寵干城雖久  
曾無汗馬之勞守土何功獨懼濡鶡之刺仰瞻宸極唯

誓糜捐臣與軍校等無任感天荷聖歡呼蹈舞激切屏  
營之至

賀車駕還京表

臣某言今月廿七日得本州進奏院狀稱前月廿二日  
車駕還京者戎索已清震遊乃復凡在臣子慶抃同深  
臣某中謝伏以五載四巡虞書所紀一月三捷周雅攸  
稱商湯乃致討於鬼方漢文亦親臨於細柳東征西怨  
用慰溪后之心春蒐夏苗爰示治兵之典顧惟時邁允

謂國章崇文廣武聖明仁孝皇帝陛下誕膺元符奉若  
古訓垂衣裳而致治百度惟貞舞干羽以懷柔五兵載  
戢然燕南尚屯於虎旅漠北猶有於王庭輒率引弓之  
民敢肆穿窬之盜雖九天命將六月出師日獻橐街之  
俘行案榆溪之塞而陛下方欲勞軍於壁責戰于邊親  
御戎車躬秉武節貔貅奮怒將食肉以寢皮擅毳餘氛  
悉膏原而塗地邊塵永息冀北克清出觀民風既省方  
而展義入數軍實爰舍爵以策勲舉羣臣之壽觴獻九

廟之戎捷歡娛載洽慶賜遂行固與夫瑤池之濱空疲  
於八駿有洛之表遂至於十旬不可同日而語也臣忝  
守使符僻在裔壤六龍順動獨遠屬車之塵百辟歡呼  
莫刪大夫之後瞻戀之極抃蹈無涯

武夷新集卷十二